


圖書編 十三




庫 文 閣 内			
一 九 四 函	三 〇 三 六	漢	書
七 架	六 四 冊	類	

庫 文 閣 内			
三 〇 三 六	三 〇 三 六	漢	書
二 三 架	六 四 冊	類	

(九本)

内 閣 文 庫	
番 號	漢 3037
冊 數	64 (9)
函 號	366 85



綴じ部(喉部分)の文字など開きが不鮮明な箇所あり

圖書編卷之十三

淺草文庫

三禮總叙

南昌後學章潢本清甫編

潛單禮曰曲禮古禮經篇名經先曲禮曲禮禮之本也

禮天體也天體物不遺故物必有則自內心外貌思慮

視聽飲食衣裳之有其節若語默進退取舍生死之有

其介與凡親疏貴賤交際事使之有其體各品節之以

立教蓋曠不厭勤不亂而幾微畢察委旋時中也命之

曰曲禮槩其目曰三千非質三千言微乎微耳蓋德性

之精微中庸畢具而高明廣大都焉時著時察之謂知

隆此由此之謂行故致曲者知微也儀禮者先王訓齊天下之具經綸人義之大端也爲之冠以重成人爲之婚以合二姓爲之鄉飲鄉射以教德讓爲之壘夕器服以哀死亡爲之饋食饗奠以備鬼神其親邦國之交秩上下之體又爲聘覲焉以將之是儀法之大者譬天儀象乎則二十八舍以經天而治要在論官故周禮經官建冢宰之官以儀天建司徒之官以象地建宗伯春官以成仁建司馬夏官以成聖建司寇秋官以成義建司空冬官以幹事而六官三百六十屬上法乎天行蓋周禮制而儀曲有官儀禮制而人義有紀曲禮制而人道有理三禮者周公明天道察民故以與人治之大順也仁者人也由禮則復於禮而仁全仁全而天全矣周衰禮廢迨春秋晉韓起適魯猶及見舊典禮經歎之曰吾乃今知周公之德與周之所以王蓋其感也孔子欲觀周道適周學禮焉歎之曰大哉聖人之道洋洋乎發育萬物峻極于天優優大哉禮儀三百威儀三千歎道盡於禮也又贊之曰郁郁乎文已憂寐志之世莫能遵明於是乎作春秋以維周禮如此至戰國諸侯惡其害已經用播絕自孟子未之及見斯下久矣漢興河間獻王篤記古始博購得周禮五官而亡其冬官得考工記附

經後備冬官之記高堂生實始傳儀禮經僅十有七篇
大小戴次曲禮僅上下二篇殘缺失次甚矣

三

周禮為綱

禮

儀禮為經

圖

禮記為傳

漢志曰帝王質文世有損益至周曲為之防事為之制
故曰經禮三百威儀三千及周之衰諸侯將踰越法度
惡其害已皆滅去其籍自孔子時而不具至秦大壞漢
興高堂生傳博士禮十七篇

韓愈曰嘗苦禮儀難讀又其行之于今者蓋寡沿襲不
同復之無由考于今誠無所用之然文王周公之法制
粗在于是孔子曰吾從周謂其文章之盛也古書之存
者希矣百氏雜家尚有可取况聖人之制度耶
直德秀曰韓子可謂好古矣然以于今無所用則亦考
之未詳也

朱熹曰儀禮禮之本根而禮記乃其枝葉又曰儀禮經也禮記傳也

朱熹子在政其書曰儀禮之為今書也於奇詞奧旨中有精義妙道焉於纖悉曲折中有明辯等級焉不惟欲人之善其生且欲人之善其死不惟致嚴于冠婚鄉射朝聘而尤嚴于喪祭後世徒以其推士禮而達之天子以為殘缺不可考之書徐而觀之一士也天子之士與諸侯之士不同上大夫與下大夫不同等而上之固可得而推矣

按古禮之傳于世也有三儀禮禮記周禮也然儀禮止有士大夫禮而無天子禮必合彼二禮與他書有及于禮者然後成全禮焉朱子自輯家鄉邦國王朝禮其餘喪祭二禮以付其門人黃幹初復僅以成書名曰經傳通解後之言禮者不至棄經而任傳違本而逐末而欲

復古禮尚有攷于斯書

以上論儀禮

文中子曰先師孔子以王道極是也如有用我則執此以往又曰吾視千載已上聖人在上者未有若周公焉其道則一而經制大備後之為政有所持循

按周禮一書後世假而用之者王莽也輕而用之者蘇綽也誤而用之者王安石也未有能善用之者竊恐時

異勢殊官政事體民情土俗不皆如古惟宜精擇其切
要者而審行之必執其書而一按其制其流之弊安知
不與三子同歸乎

唐太宗曰周禮真聖作也首篇云惟王建國辨方正位
體國經野設官分職以爲民極誠哉言乎不井田不封
建不肉刑而欲行周公之道不可得也

唐書曰周禮者周公致太平之書先聖極由表之典法
天地而行教化辨方位而叙人倫其義可以幽贊神明
其文可以經緯邦國備物致用其可忽乎

程頤曰必有關雎麟趾之意然後可以行周官之法度
張載曰周禮是的當之書然其間必有末世增入者如
盟詛之類必非周公之意

朱熹曰周禮乃周家盛時聖賢制作之書又曰周禮一
書周公立下許多條貫皆是從廣大心中流出又曰周
官徧布精密乃周公運用天理爛熟之書又曰比閭族
黨之法正周公建大平之基本加棊盤擺布定後棋子
方有放處此書大綱是要人主正心脩身齊家治國平
天下使天下之民無不被其澤又推而至於鳥獸草木
無一不得其所不如是不足謂之裁成輔相參贊天地
又告其君曰周禮天官冢宰一篇乃周公輔導成王垂

法後世用意最深切處欲三代人主正心誠意之學於此考之可見其實

范祖禹曰天地有四時百官有六職天下萬事盡備于此如網之在綱衆之挈領雖百世不可易也人君如欲稽古以正名苟舍周官未見其可

呂祖謙曰朝不混市野不踰國人不侵官后不敢以干天子之權諸侯不敢以僭天子之制公卿大夫不牟商賈之利九卿九牧相屬而聽命于三公彼皆民上也而尺寸法度不敢踰一毫分守不敢易所以習民于尊卑等差階級之中消其偏上無等之心而寓其道德之意是以民服事其上而下無覬覦賤不亢貴卑不踰尊舉一世之人皆安于法度分守之內志慮不易視聽純一易直淳龐而從上之令父詔其子兄授其弟長率其屬何往而非五禮六樂三物十二教哉方位國野設官分職何往而非以爲民極哉嘗讀晉國國語每嘆絳之富商韋藩木楗過朝之事以爲富商之饒于財使之澤其車而華其服非不足也而必易車服于過朝之際不敢與士大夫混然無別焉民志之定而中道之存成王周公之遺化固隱然在此也

按周禮一書或以爲周公作或以爲非或謂文王治岐

之制或謂成周理財之書或謂戰國何陰謀之書或謂
 漢儒附會之說或謂末世瀆亂不經之書林存或作七
 論七難以排之

朱熹曰後人皆以周禮非聖人書其間細碎處雖可疑
 其大體非聖人做不得又曰謂是周公親筆做成固不
 可然大綱却是周公意思由是觀之是非明矣古人有

言周禮一書有關文軍司馬有省文遂人匠有互見九

品舉有兼官公孤不備數教有豫設凡千里封公四封

有不常置夏采方相有舉其綱者四兩為有副相副貳

者白卿至下士各隨有常行者垂法象有不常行者合

詢國遷今觀諸經其措置規模不徒于彌亮天地和洽

神人而盟詛讐仇凡所以待衰世者無不備也不徒以
 檢柅君身防絕禍患而米盭絲枲凡所以任賤役者無

不及也使之維持一世則一世之人安維持百世則百
 世之人安維持千萬世則千萬世之人安貽謀燕翼後

世豈無辟王皆賴前哲以免則周公之用心也所謂燕
 三王監二代盡在于是是書之作于周公與他經不類

禮記就于漢儒則王制所謂朝聘為文襄時事月令所
 說官名為戰國時事魯未若周公禮之純乎周典也由

此觀之則後儒疑周禮細碎者可以灑然矣

吳澂曰周公相成王建六官分六職卽其設位言之則曰周官卽其制作言之則曰周禮周衰諸侯惡其害已滅去其籍秦孝公用商鞅正與周官背馳始皇又惡而焚之漢河間獻王好古學購得周官五篇武帝求遺書得之藏于秘府哀帝時劉歆校理秘書始著于錄畧然各官已亡以考工記補之而五官亦復錯雜傳至于今莫敢是正今本尚書以考之周官一篇成王董正治官之全書也執此以考周禮之六官則不全者可坐而判也夫冢宰掌邦治統百官均四海執此以考天官之文則其所載非統百官均四海之事可以知其非冢宰之職也司徒掌邦教敷五典擾兆民執此以考地官之文則其所載非敷五典擾兆民之事可以知其非司徒之職也宗伯掌邦禮治神人和上下司馬掌邦政統六師平邦國執此以考春夏二官則掌禮邦政者皆其職也舍此則非其職司寇掌邦禁詰奸慝刑暴亂司空掌邦土居四民時地利執此以考秋冬二官則凡掌邦禁邦土者皆其職也舍此則非其職是故天官之文有雜在他官者如內史司士之類亦有他官之文雜在天官者如甸師世婦之類地官之文有雜在他官者如太司樂諸子之類亦有他官之文雜在地官者如問師柝氏之

類春官之文有雜在他官者如封人大小行人之類亦有他官之文雜在春官者如御史大小胥之類夏官之文有雜在他官者如銜枚氏司隸之類亦有他官之文雜在夏官者如職方氏弁師之類至如掌祭之類吾知其惟秋官之文縣師屢人之類吾知其為冬官之文緣文尋意以考之參諸經籍以證之何疑之有

周禮有官
聯以會官
治不宜加
此之區分

按劉歆以考工記補冬官未始有異議者宋淳熙中俞廷椿始著復古篇謂司空篇實出于五官之屬且因司空之復而六官之譌誤亦可以類考嘉熙間王次點復作周官補遺元秦定中丘葵又參訂一家之說以為成書吳徵作三禮考註且謂冬官未嘗亡而地官之文實亡由是以觀則冬官實未嘗亡所亡者冬官首章爾

以上以
論周禮

程頤曰禮記雜出于漢儒然其間傳聖門緒餘及格言甚多如樂記學記之類無可議者檀弓表記之類亦甚有至理惟知言者擇之如王制禮運禮器亦多傳古意又曰禮記除中庸大學惟樂記為最近道表記其亦近道乎其言正

朱熹曰禮記要要燕儀禮讀如冠禮喪禮鄉飲酒禮之類

皆載其事禮記只發明其禮讀禮記而不讀儀禮則許多禮俱無安着處又曰或謂禮記乃漢儒說話恐不然漢儒最純者莫如董仲舒仲舒之文最純者莫如三策何曾有禮記中說話來如樂記所謂天高地下六句仲舒安能到此必是古來傳流得此文字如此

吳徵曰漢興得先儒所記禮書一百餘篇大戴氏刪為八十五小戴氏又損益為四十二曲禮檀弓雜記分為上下馬氏增以月令明堂位樂記鄭氏從而為註總四十九篇秦火之餘區區掇拾存十一于千百雖不能以皆醇然先王之遺制聖賢之格言往往賴之而存

周行已曰聖人制為冠婚喪祭朝聘鄉射之禮以行古亞父子兄弟夫婦朋友之義其形而下者見于飲食衣服之用其形而上者極于無聲無臭之微衆人勉之賢人之行之聖人由之故所以行其身與其家與其國與其天下者禮治則治禮亂則亂禮存則存禮亡則亡

按禮記一書當以禮為主而分四科以類考之先儒謂四科禮也儀也樂也制度也以此四科讀此四十七篇思過半矣

以上論禮記

禮也者理也理也者性也性也者命也維天之命於穆不已而其在於人也謂之性其粲然而條理也謂之禮

其純然而粹善也謂之仁其截然而裁制也謂之義其昭然而明覺也謂之知其渾然於其性也則理一而已矣故仁也者禮之體也義也者禮之宜也知也者禮之通也經禮三百曲禮三千無一而非仁也無一而非性也天叙天秩聖人何心焉蓋無一而非命也故克己復禮則謂之仁窮理盡性以至於命盡性則動容周旋中禮矣後之言禮者吾惑焉紛紜器數之爭而牽制刑名之未窮年矻矻弊精於祝史之糟粕而忘其所謂經綸天下之大經立天下之大本者禮云禮云玉帛云乎哉人之不仁也如禮何哉故老莊之徒外禮以言性而謂禮爲道德之衰仁義之失旣以墮於空虛濇蕩而世儒之說復外性以求禮遂謂禮止於器制度數之間而議擬倣像於影響形跡以爲天下之禮盡在是矣故凡先王之禮烟蒙灰散而卒以煨燼於天下要亦未可專委罪於秦火者僭不自度嘗欲取禮記之所載揭其大經大本而疏其條理節目庶幾器道本末之一致又懼其德之弗任而時亦有所未及也間嘗爲之說曰禮之於節文也猶規矩之於方圓也非方圓無以見規矩之用非節文則亦無從而睹所謂禮矣然方圓者規矩之所出而不可遂以方圓爲規矩故執規矩以爲方圓則方

圓不可勝用舍規矩以爲方圓而遂以方圓爲規矩則
規矩之用息矣故規矩者無一定之方圓而方圓者有
一定之規矩此學禮之要盛德者之所以動容周旋而
中也宋儒朱仲晦氏慨禮經之蕪亂嘗欲考正而刪定
之以儀禮爲之經禮記爲之傳而其志竟亦弗就其後
吳幼清氏因而爲纂言亦不數數於朱說而於先後輕
重之間固已多所發明二子之見其規條指畫則既出
於漢儒矣其所謂觀其會通以行其典禮之原則尚恨
吾生之晚而未及與聞之也雖然後聖而有作則無所
容言矣後聖而未有作也則如纂言者固學禮者之箕
裘必踣而可以少之乎

禮者理也即吾心之天理也吾人莫不受天地之中以
有生而威儀定命孰能一日越斯禮哉論禮者必究其
禮之原則周禮儀禮禮記可得而言之矣先儒謂周禮
其綱也蓋亦有見於六官之制辨方正位體國經野故
謂之爲綱耳又以冠禮婚禮士相見禮鄉飲酒禮鄉射
禮大射禮備載於儀禮而禮記則有冠義婚義士相見
義鄉飲酒義鄉射義大射義等篇故謂儀禮爲經禮記
爲傳但論禮不識其原則不特六官之屬疑其各有所
雜封建之制與王制殊雖各自一書言之或疑其爲治

岐理財陰謀附會之書或疑喪服皆講師問答語或疑
曲禮作於曲臺月令記於呂不韋其中多漢儒所雜今
且無論已然禮原于天而具之人心無古今無貴賤一
也三禮雖同出於聖人而周禮詳六官之統屬儀禮嚴
一朝之制度故各有司存惟禮記一書自曲禮而下多
述古禮之遺與夫變禮之由大而朝聘享祀微而周旋
曲折養生送死交神接人莫不由自然之品節為自生
民以來君君臣臣父父子子得以順其此心之條理節
文而不淪於禽獸者賴有此理以匡正之耳或諸篇各
有所指然聖賢相與發明斯禮之大本大原以承天道
以治人情而一歸諸大中至正之矩乃禮記之所以立
教也信哉禮記為經與五經並列而不可以綱目經傳
分也明矣况禮莫大乎倫雖官制儀節皆所以品節乎
五倫而人性自然之條理所以恭敬樽節退讓者一皆
其性情不容自己者也善乎臯陶篇曰天叙有典勅我
五典有敦哉天秩有禮自我五禮有庸哉自天子至庶
人同此五典也其不同者五禮之等殺耳可見五禮之
庸也雖至於經禮三百曲禮三千而要不出於五倫之
外凡五服五章五刑五用皆此禮也皆所以敦此典也
然典曰天叙禮曰天秩其等殺不齊豈作而致其情哉

天理之節文人心所自有者也本吾心之天則而聲爲律身爲度周旋折旋率履不越由是行之君臣父子之間夫婦長幼朋友之際秩然各得其禮自其宏綱大要名之爲經禮自其纖悉備具名之爲曲禮自朝廷頒之卽爲萬邦之紀綱法度自一人行之卽爲一家之規矩準繩雖尊卑上下進退升降以至朝聘祭享車旗服色之繁而其秩然不亂者一皆揆之天理而安卽之人心而順所以謂之爲天秩也晏子對齊侯亦曰禮之可以爲國也久矣與天地並君命臣共父慈子孝兄愛弟敬夫和妻柔姑慈婦聽禮也誠哉是言也足以發明曲禮諸篇之旨也若夫吉凶軍賓嘉則皆以此時措之耳是禮也匪特斯人爲然試觀之乾坤定位卑高以陳其間如日月星辰之布列山川土石之奠載飛潛動植之群分類聚莫不有條理也此猶有形可觀有迹可觀者也晝夜寒暑之往來剛柔燥濕之消長孕鬻化生之乘除皆並育並行不害不悖孰主張是孰綱維是而天秩可默會矣本天秩以明祀則三禮中或雜或缺或爲漢儒所錯亂者如尺度權衡孰得而淆之此所以論禮貴識其原而禮記不可以傳言也否則或逞已見或執舊聞徒致詳於儀文度數之末品物器用之微解名義定規

制遂以為禮在是不知見禮知政與天地同節者果安在也是故求禮者無求禮於書而求諸吾心之天則渾然大中之道已在乎我雖至敬無文而繁文縟節實自此出也彼三禮所載皆吾心已試之節文而先王制禮不敢過不敢不及者不在茲乎然非謂制度文章可盡廢而不講也禮無本不立無文不行欲人反諸身心以達之五倫而求其所謂禮之本故于禮記尤有所當潛神者耳不然制度文為自漢儒以來議之亦詳矣孔子何以欲從先進而大林放之問

儀

士冠禮

士昏禮

士相見禮

鄉飲酒禮

鄉射禮

燕禮

禮

大射儀

聘禮

公食大夫禮

覲禮

喪禮

士喪禮

篇

堅夕禮

士虞禮

特牲饋食禮

目

少牢饋食禮

有司

讀古人之書者須識古人之心焉而後書中之精蘊庶
幾可默會也然古人之書傳之已久不無錯亂殘闕
况其全已不可得矣又徒執其儀文品節從而信之疑
之亦未矣豈善讀古人之書者哉果能會其心師其意
而不泥其文與迹雖謂儀禮至今存可也古者述朝饗
聘祭之儀車旗服飾之制謂之儀禮亦先王經世之遺
典也自秦焚禁以來至武帝表章六經此書尚未出况
馬鄭叙述周禮而不及儀禮劉歆叙述儀文而不及儀
禮喪服終篇無天子諸侯之文可見在漢時已不免殘
闕錯亂非全經也明矣至宋又禁之不列學官今欲求

全經於千百之下也難矣哉然韓愈嘗苦儀禮難讀以
爲文王周公之法制粗在於是班固藝文志以魯高堂
生所傳博士禮十七篇其篇數與儀禮同則此書固非
全經亦必古人之所遺也所以信儀禮者則曰儀禮經
也禮記傳也故儀禮有冠禮有昏禮禮記則有冠義昏
義儀禮有士相見禮有鄉飲酒禮禮記則有士相見義
鄉飲酒義儀禮有鄉射禮有大射禮禮記則有鄉射義
大射義儀禮有燕禮有聘禮禮記則有燕義聘義禮必
有義義以釋禮緣文義以考之禮記特儀禮之傳耳人
知信傳而不知信經焉何歟然宋樂史謂儀禮有可疑

者五豈無見而然哉以漢儒傳授曲臺雜記後馬融鄭
衆始傳周官而儀禮未嘗以爲教授一疑也周禮缺冬
官求之千金不可得使有儀禮全書諸儒不獻之朝乎
班固七畧劉歆九種並不著儀禮魏晉梁陳之間是書
始行二疑也聘禮篇所記賓行饗餼之物禾米芻薪之
數籩豆簠簋之實鉶壺鬯甕之列考之周官掌客之說
不同三疑也其中喪服一篇蓋講師設問難以相解釋
之辭非周公書四疑也周官所載自王以下至公侯伯
子男皆有其禮而儀禮所謂公食大夫禮及燕禮皆公
與卿大夫之事不及于王其他篇所言曰主人曰賓而
已似侯國之書使周公當大平時豈不設天子之禮五
疑也今考其書猶有可疑者在焉吉凶軍賓嘉皆有禮
也而軍禮獨闕自天子至士皆有冠禮而大夫獨無鄉
飲酒禮有黨正以正齒位而今獨不載焉賓禮之別有
八燕禮之別有四皆冠以士夫射之禮獨名曰儀朝遇
之禮不錄而獨存覲禮其他禮食不載而獨有公食大
夫禮謂是書無殘闕雜亂也可乎哉但古之全經不可
見而人心天理之品節猶之古也彼信之者止信其儀
文必出自古人耳果自信於心而真知其爲天秩之禮
乎疑之者亦疑其非古之全禮云耳果反之吾心而真

見其天則之相悖乎蓋經雖不全亦賴漢晉諸儒補緝之力猶及見古禮之遺所以朱子與章廬吳氏倦倦於是書也我朝禮儀定式大明集禮是即今之儀禮也考禮儀者考之國典及文公家禮而用之於今焉則雖謂儀禮至今存也非謾語矣噫真會古入之心師古人之意則儀尚不足以盡禮也况於儀禮之遺經哉

讀禮記敘

嘗聞禮記非全經亦非醇乎經也壯年細心誦繹漸通大意蓋古先聖王承天道治人情典制經曲雖不復觀其全然亦未嘗不因記載而獲觀其緒餘焉雖多雜於漢儒之補綴而聖賢之邃言與旨炳然如赤日行空豈瞬息能消其明哉或曰禮樂不可斯須離缺者補之雜者剔之不亦賴于後之人乎曰禮樂通乎造化存述賴乎聖明未易言也近於四十七篇各因其類以相屬分爲八款庶誦習者易爲力耳若夫訂證遺經則自有精通禮樂者在

禮記大旨

嘗玩易繫天尊地卑乾坤定矣卑高以陳貴賤位矣此禮之所自來而先聖法天以制禮乎故臯陶謂五禮爲天秩中庸謂親親尊賢之等殺禮所生也孔子所定禮

樂莫可考矣世傳三禮如禮記一書得非古禮之遺乎
當夏商之衰孔子尚嘆杞宋之文獻不足徵矣今于千
百年後猶得見古人之遺禮亦何幸也想漢庭經師轉
相與撰次所聞故高堂生后蒼輩記述秦灰之後獲存
什一于千百皆不可知然其初積二百餘篇至大戴刪
爲八十五篇小戴復刪爲四十九篇今賴其傳述得以
好古而敏求焉然其撰述于高后者文辭意義果無所
增損二戴所刪定果一無闕失錯雜乎但記者融滯淺
深弗齊而純疵自不可掩然精義良法淵源所自要皆
古先聖賢之緒餘決非漢儒所能創始以肇後世之宗
也善學者得先聖遺意于掇拾煨燼之餘而此心無休
之禮得徵之古禮以定準則間有龐辭贅語畧之可矣
禮一也周禮儀禮禮記既各一其編集則其作述志意
各有攸當何必以經傳綱目分屬之也矧禮記自有綱
目存焉析之雖三百三千不足盡其詳總之只一理而
已矣何也天則蘊之德性典則著之訓謨統同之中固
有散殊者在而散殊之內未嘗無統一者寓也予嘗病
其篇章浩博未易會歸因各以其類別之爲八曲禮內
則少儀玉藻一也哀公問燕居閒居檀弓曾子問二也
禮運禮器大傳緇衣表記坊記三也樂記四也冠義昏

義鄉飲酒義射義聘義投壺五也喪大記喪小記服問
間傳三年問問喪奔喪服四制雜記六也祭法祭義祭
統郊特牲七也王制月令學記王世子明堂位經解儒
行深衣八也蓋亦取其意義相近者統歸一類不特便
於誦習檢閱而先聖制作本旨亦易以領會且俾學者
精神併歸一欵不至渙散已爾若夫原次篇目曷敢紊
亂之哉

禮猶體也體不備君子謂之不成人曲禮篇先儒取以
冠禮記者豈徒記古人之虛文哉蓋曲禮三千其體備
于一身者委曲詳悉不如此不足以曲盡其必至之情
也夫人德性中森然天則畢具如心神之思慮經緯日
端如耳目口體之視聽言動親疎貴賤之交際事使天
人幽明之對越駿奔以及衣服飲食升降進退大而死
生常變小而洒掃應對至纖至悉至廣至曠皆出乎天
理人情之自然也只舉動稍越乎禮而曲折之未當則
耳目無所加手足無所措赧然不可以爲人矣何也此
心自亂其天然之條理而行道間當其回旋轉折稍不
循其塗轍則一步不可行也然致曲者豈徒取諸周身
之儀度而安排布置于其間哉篇首曰無不敬儼若思
安定辭安民哉此禮之所以自然曲盡而散殊中自有

統同者在况以此求之四十七篇何一而匪一敬之曲成哉內則記閨門之軌範卽曲禮行于家庭之間也少儀記小學之支流餘裔卽曲禮行于儀節之小也玉藻記天子諸侯之服冕笏珮諸制卽曲禮行于朝宁之表也故三篇統屬曲禮一類皆人身隨時隨處所以曲致其自然之敬也人見曲禮若此乎嚴肅未免謂聖人有意以斂束乎天下之身心不知先聖亦因人心之敬有不容自己者故著之章程爲萬世法耳學者誦習此類而有得焉不特古禮儀文節度一一可循然由此心之無不敬以發見於四體周旋折旋中規中矩自然與天則脗合詎止肌膚有會筋骸有束已哉

人受天地之中以生以爲動作禮儀威儀之則所謂命也卽所謂禮也在天謂之天則在物謂之物則聖人承天道治人情不過乎物則而已雖禮之曲折千變萬化與時皆宜孰知物則自有不可過者在乎觀哀公問大禮如何又問人道誰爲大故孔子曰古之爲政愛人爲大所以治愛人禮爲大所以治禮敬爲大卽首篇無不敬之意也中間雖由大昏以及仁人孝子不過乎事親如事天事天如事親而禮于是乎至矣燕居記孔子以禮教子張子貢子游然禮所以制中而禮有九大饗有

一四未易言也閒居記孔子以禮教子夏然必達禮樂之原以致五至而行三無未易窺也擅弓記大禮之曲而中也曾子問記夫禮之變而通也夫孔子雅言不越執禮而百王典禮賴以折衷此類六篇皆孔門問答之語其中微辭奧義淵乎莫測約言之不過乎物焉耳苟學聖物格知至則不能神明其本原洞晰其變化拘拘乎儀節之末欲動容周旋中禮也難矣哉

禮原於太一合天地四時陰陽日月五行萬物而渾乎一體惟人者天地之心鬼神之會萬物之所體也但本諸天者謂之運備諸人者謂之器雖云道本運而無所積器則滯而有所拘然天道其運乎人道其器乎運非精器非粗天人合一器即運之有體者是也禮運記帝王禮樂之因革及陰陽造化之流通于以原夫禮之所由起禮器記學禮者成德器之美行禮者明用器之制而一器二義不可泥也大傳言人道有三無非記祖宗人親之大義緇衣記在上之人爲下民之則傲表記記君子之德有表儀之著見坊記則謂禮禁亂之所由生猶坊止水之所自來蓋取以禮坊民之義也此六篇大約統論天地帝王以及人之所以體備乎禮者謂非曲禮之大原哉學禮者必器以乘運而究竟乎人道之大

始斯可以繫民好樹民表而禮之大坊于茲乎定矣
陰陽之氣克塞乎天地和敬之德貫徹乎人心宣之爲
聲樂其天地人之聲教乎凝之爲象禮其天地人之象
教乎然非禮自禮樂自樂也人心之和暢發之爲德音
而樂之肅肅清明即禮也人心之敬發之爲德容而禮
之雍雍溫柔即樂也何也一陰一陽之謂道天地之陰
陽不能離孰謂禮樂之可離哉樂記具載禮記中正禮
樂不相離之意也但詳玩樂記自由人心生以至手舞
足蹈不過樂聲樂舞音容節奏已爾其于聲氣之元制
器之法俱未之及焉然于禮樂相須同節同和玉盈主
臧諄諄乎皆古先聖人之遺意且謂人生而靜天之性
也樂主反情以歸性而精義具存文亦醇雅不雜惟于
此潛神默會真識夫陰陽禮樂通一無間則聲律身度
凡五音六律自合乎天地之中和庶古樂之全經在吾
心矣于樂制乎何有

先聖制禮各有義存焉然其數可陳其義難知苟徒習
孰其儀文度數而不達其義則亦不過宗祝有司之事
爾已是以故冠者禮之始也聖王重冠所以明成人之道
也昏禮者禮之本也將合二姓之好上以事宗廟下以
繼後世也鄉飲酒禮明君子之相接尊讓潔敬所以使

民知尊長養老以成教也射必行鄉飲酒之禮所以明長幼之序而各射已之鵠各釋已之志也燕禮者所以明君臣之義而旅行獻酬皆有差等不敢紊也聘禮所以明貴賤而聯邦交也投壺則又有射之細者耳此類以義名篇其禮文制度咸載諸儀禮茲各陳其義以釋之雖謂儀禮為經義為傳亦可矣惟射于儀禮不相涉然射侯者射為諸侯也此果射之義乎若鄭氏釋昏義以夫人嬪世婦御妻悉歸之後宮而為天子之昏且為之分夕誣經甚矣學禮者其慎辨諸

子之于親無所不用其至孟子謂養生不足以當大事惟送死可以當大事故必誠必信凡棺槨衣衾之設踊哭泣之節親疎冠服之等皆喪禮當慎重者故周官以喪禮哀死亡也喪大記記曲禮行於大喪喪服小記固記喪事之小然釋喪服傳也喪服問記始喪及喪服之制間傳記喪服輕重之宜三年問記喪必三年之義問喪記悲哀歛袒免杖之節奔喪記在外聞喪而奔之禮喪服四制記喪服之制必有仁義禮智四者而後可以當送終之大事雜記雖以記喪為主然燕言三患五恥觀睹取盜之事故謂之雜也要之此類十篇悉喪中之曲禮也夫聖人制禮文必稱情一本乎哀慟迫切之

衷而爲之品節云爾惟讀其文繹其義始見作者之意
皆人子真情不容自己者其如行不著習不察何哉
周禮大宗伯專職理幽故祭祀之典教著十倫禮重五
經至云惟聖人爲能饗帝惟孝子爲能饗親祭典豈易
言哉祭法記祭祀之法也凡禘郊祖宗廟祫壇墀靡不
具列祭義記祭祀之義也凡疏數敬怠反始報魄靡不
詳明雖法見于外義存于中而有其法必有其義故相
次以名篇祭統記祭祀之本有法有義統之則本于心
故曰外則盡物內則盡志此祭之心也郊特牲雖記祭
天之禮而雜冠與昏當各以類附但即郊禮之雜他篇
雜可例推矣郊社宗廟三才之道也非識天地之心洞
性命之理欲饗帝親親以接三才之奧也難矣惟于此
類研窮古人記禮之精蘊不徒參其法且析其意會其
統則不待對越在天而其心常若與神明交幽明感通
理之必然矣

易曰嘉會以合禮又曰觀其會遇以行其典禮豈儀節
云乎哉凡帝王之創設天地之時令學制經解何一非
禮何一而非吾之所當會通者彼王制雖記于漢太常
博士弟子未必盡合乎王者之制而歷代法制亦賴以
流傳月令雖記于秦呂不韋未必真合乎古明堂之法

而十二月所行之政令亦藉以記載學記雖無當于大學然古者建學造士之軌範亦得有所據文王世子雖中雜周公踐祚之語而文武爲世子與周公教世子皆至教所在明堂位雖適以彰魯國之僭而君臣上下尊卑前後各有定位亦因以存焉經解中云霸王之器恐非孔子所道而六經之教實分別不爽儒行其條十有五旨意重復必非孔子之言而古儒之重行是或一道也若深衣則純記其制焉此類八篇篇各一義果有志典禮須博識兼收萃衆美而觀會通焉古禮庶幾其可以復矣

問孔子謂人之生也直又謂斯民也三代直道而行者也孟子謂直養而無害且易云直方大書云寅直清詩云其直如矢均之乎以直爲尚也禮獨有取于曲焉何哉曰子獨不聞直而無禮則絞乎彼子爲父隱父爲子隱曲亦甚矣孔子何爲謂直在其中也真信得父子相隱直在其中則曲禮不待辨矣譬之梓匠輪輿必以規矩成其方圓然規無圓之形也苟爲不曲安能成其圓乎矩無方之形也苟爲不曲安能成其方乎子無局于方圓之器惟執規矩以運明巧斯曲成萬物而不遺矣問凡學禮記者莫不病其紕繆龐雜之大多也子析其

類得不思以祛其雜歟曰他書之闕誤難識禮記之錯
 雜易知矧人皆知之矣何必決去之為快耶想秦法大
 嚴漢惠始弛其禁文景時諸儒尚只以口耳相為授受
 難必字句之不訛也然各篇匪出一人雖本聖人之意
 實皆漢儒之文見有淺深故理有通塞筆有工拙故辭
 有純疵况敷衍波瀾大多未免華而失實可盡律以聖
 門之記述哉雖然聖經久湮蝌蚪殘缺得似經者皆經
 也况其傳流各有自來也但師門各守章句或古禮中
 雜以時制而莫之察或古文參以今文而莫之辨傳久
 失真豈一朝一夕之故哉二載雖明禮然匪深於聖人
 之學者或刪述間雜以己意亦不可知愚謂篇章皆漢
 儒之組織禮制必先聖之流傳依今文求古禮得意忘
 言何必訛舛之盡祛而後深於禮哉

曲禮

至哉禮之曲也人肌膚有會筋骸有束耳目手足以視
 聽行持有則也由衣服飲食由執事居處畢有執有物
 也猶其曲也以有至也猶其至也以能曲也故不曲不
 足以為禮非禮而曲君子謂之辟若諂不謂曲也是故
 奉之當心也天子上之矣國君取其衡大夫綏之矣乃
 士則當帶而提何曲也性之直者靡然矣君之與尸也

接武耳大夫繼武矣士間一武曰中武無徐趨皆然謂必接武也繼也中也其則也何其曲也性之直者靡然矣其疾趨欲發成其爲趨也而手足無移以不失其莊圈承行不舉足成其爲圈承也而齊如流檐如以不失其齊端行頤雷如矢直也乃弁行屨剡剡起矣執圭王則舉前曳踵踣如也諸布武有則也一何曲也性之直者靡然矣古席地而坐奉席如橋衡平也設席有鄉順陰陽乃其間函丈也若畫後也畫前也如有則不得過何曲也蓋奉席一天授坐而坐以爲恭也乃授立受立而坐勤之矣故立受立也不坐何曲也性之直之者靡然矣飲食之有祭也敬讓道也其飲之食之也欲其飲食之也乃客祭主人顧與辭曰䟽食不足祭其殮與辭曰殮食不足爲殮也何曲也品食有水土之品焉豈必備嘗不質問其嘗否曰子亟食于某乎嫌億其未嘗也道術有六官之分豈必兼通不質問其能否曰子習于某乎善于某乎嫌億其未學也何曲也性之直者靡然矣故曰一之于性情則兩失之矣一之于禮義則兩得之矣此之謂也禮義者性情之極也夫禮之有曲也由物之有則也引類而申之衆動交于身而動于前何非則也其曲何可得爽也畢公之命曰惟公懋德克勤小

物彼以小物爲無當而忽之者窮大而失其歸者也惟
毋不敬乃見天則

曲禮

禮也者所以約束人之身心使一循乎天理中正之則
者也無本不立無文不行一敬焉盡之矣禮記四十九
篇雖其中多孔門師弟問答語要皆古禮之遺或亦不
免爲漢儒雜亂而其不可易者自有在也然必首曲禮
二篇豈無謂哉曲禮之爲教也凡升降進退食息起居
應對唯喏至纖至悉莫不有一定之規矩存焉自天子
至庶人自幼學至期頤未有一人能越斯禮亦未有一
息能越乎斯禮者也故曰道德仁義非禮不成教訓正
俗非禮不備分爭辨訟非禮不決君臣上下父子兄弟
非禮不定宦學事師非禮不親班朝治軍涖官行法非
禮威嚴不行禱祠祭祀供給鬼神非禮不誠不莊是以
君子恭敬樽節退讓以明禮甚矣禮之切于人也後之
人猶以此爲儀文度數之末節何哉蓋思人之所以爲
人自吾心之念慮以達諸一身隨所應接各有條理三
千三百夫固天然自有之等級也所以謂禮猶體也體
不備君子謂之不成人詩曰相鼠有體人而無禮人而
無禮胡不遄死極言人不可無禮也且學者習斯禮亦

各不齊有見于禮可固人肌膚之會筋骸之束則謂致
禮治躬檢束不可不嚴不免矯強拘迫之勞有見于至
禮不讓至敬無文則謂禮以制心儀節非其所尚不免
乎疏畧簡亢箕踞跛倚之病是皆不知正心脩身直內
方外其禮本一致也觀孔子嘗謂恭而無禮則勞慎而
無禮則怠勇而無禮則亂直而無禮則絞是禮本自然
而勞惠亂絞則非禮矣又謂非禮勿視非禮勿聽非禮
勿言非禮勿動即四勿字其所以克己復禮何嘗無勉
然之功哉况禮謂之復于以復還吾性之所固有匪由
外爇我者如此斯可與語也斯可與語禮記之全經
也說者又謂孔子大林放之問以知本也曲禮謂非禮
文不可而曲則儀節煩矣不知曲禮正儉戚之意也所
以首云毋不敬儼若思安定辭安民哉孰謂敬非禮之
本哉惟毋不敬則穆穆緝熙翼翼昭事而儼若思安定
辭其模寫居敬樣子可謂最親切矣凡脩己安人安百
姓一以貫之而程子謂一言可以蔽三千三百之全經
者此也信斯言也將以禮為外乎視于無形聽于無聲
其心之所以齊莊而中正者固純乎天則而不踰將以
禮為內乎坐如尸立如齊其身之所以整齊而嚴肅者
一安乎天則而不過是以動容周旋中禮非盛德之至

不能苟動不以禮雖知及仁守莊澁未善也尚可以為儀文末節而少之耶或又以為天理在人心原有大中至正之則率履之間自與禮合雖曲禮少儀內則諸篇亦不能于人心有加也是又不知規矩準繩之制豈能于人心之明巧有所加乎世之欲為方員平直者不能不藉規矩準繩以運其明巧于不已周旋曲折之禮豈能于人心之條理有所加乎而世之欲周旋中規折旋中矩者不能不由曲禮以達其條理于不窮但規矩非聖人之明巧不能制而曲禮非聖人之天理中正孰能定之使世之人莫不由之哉可見是禮也聖人不過先得我心之同然自曲禮以下諸篇要皆反覆以發明斯禮至曲之蘊耳聖人制之庶民由之無貴賤無古今日用乎曲禮不見其繁且勞此所以為聖人易簡之學

月令舉要

中星孟春日在營室昏參中旦尾中

日月會于陬 營斗建寅

○仲

春日在奎昏弧中旦建星中

日月會于降 婁斗建卯

○季春日在

胃昏七星中旦牽牛中

日月會于大 梁斗建辰

○孟夏日在畢

昏翼

中星婺女中

日月會于實 亢斗建巳

○仲夏日在井昏亢中旦危

中日月會于鶉 首斗建午

○季夏日在柳昏火中旦奎中

日月會于鶉 于鶉火

斗建未 ○孟秋日在翼昏建中旦畢中

日月會于鶉 尾斗建申

○仲

秋日在角昏亥牛中且觜觿中

日月會于壽星斗建酉

○季秋日

在房昏虛中且柳中

日月會于大火斗建戌

○孟冬日在尾昏危

中且七星中

日月會于析木之澤斗建亥

○仲冬日在斗昏東壁且

軫中

日月會于星紀斗建子

○季冬日在婺女昏婁中且氐中

會于玄枵斗建丑

帝神春帝太皞神勾芒○夏帝炎帝神祝融○中央帝

黃帝神后土○秋帝少皞神蓐收○冬帝顓頊神元冥

○日春甲乙○夏丙丁○中戊巳○秋庚辛○冬壬癸

○數春八○夏七○中央五○秋九○冬六

音春角○夏徵○中央宮○秋商○冬羽

律孟春大簇○仲春夾鍾○季春姑洗○孟夏仲呂○

仲夏蕤賓○季夏林鍾○中央律中黃鍾之宮○孟秋

夷則○仲秋南呂○季秋無射○孟冬應鍾○仲冬黃

鍾○季冬大呂

十二月聽朔之處

孟春青陽左个仲春青陽大廟季春青陽右个孟夏明

堂左个仲夏明堂大廟季夏明堂右个中央土大廟大

室孟秋總章左个仲秋總章大廟季秋總章右个孟冬

元堂左个仲冬元堂大廟季冬元堂右个

月令辨

月令一書其所記時令之正政事之善雖傳之後世有不可得而廢者然以爲周公作則自蔡伯皆始也以爲呂不韋作則自陸德明始也曾以二氏之言質之將以爲周公耶孟夏令大尉則大尉乃秦官非周人之司馬也季夏令百縣則郡縣爲秦制非周人之鄉遂也季秋受來歲之朔日則建亥爲秦正非周人之建子也而蔡之說其果然歟將以爲呂不韋耶則參衣赭衣之世何取於孟春之布德坑儒焚書之世何取於仲春之釋菜罷侯置守之世何取於季夏之封侯况始皇十二年不韋已死矣至十六年秦始皇併天下以十月爲歲首而陸之說其果然歟然則是書始於何代作於何人也曰

補葺而訂證之者漢儒力也夷考其世大尉之職郡縣之制漢實因之布德之詔釋菜之禮漢實有之歲朔始於建亥諸子分王受封漢初實行之謂其出於漢儒之補葺者此也但其中有可訾議者不容不辯彼四時所主之帝所祀之處所祭之物天子所居之室所乘之車所駕之馬所載之旂與夫衣玉食穀牲噐何其拘瑣鄙陋一至此也是故東方之帝必曰大昊者出於鄒衍五行之說後儒推其相生以德始於木故大昊主春夏火也炎帝以火繼木故主夏中央土也黃帝以土繼火故

王中央秋金也少昊以金繼土故王秋冬水也顓帝以
水繼金故王冬古者盛德之君亦多矣何特於此數君
專主四時又安知木德必始於太昊也且黃帝少昊父
子也父子之間必主土金之相繼也耶德莫備於堯舜
又何四時之配祀乃不得與也曲禮之五祀曰戶竈中
霤門行是矣祭法加爲七祀古無有也惟見於漢儒之
記禮乃於春則祀戶夏則祀竈中央則祀霤秋祀門冬
祀行又以陰陽出入盛衰言之而所祀各一其處何哉
且肝木心火脾土肺金腎水此五臟屬五行不可易者
也今乃春祭先脾夏祭先肺季夏祭先心秋祭先肝冬
祭先腎鄭氏曰此以五臟之上下次之春爲陽中於藏
值脾故脾爲尊據五臟肺最居上何爲不尊肺而四時
所祭之物果合其序否也王者南面聽天下向離而治
自有常居何至春居青陽夏居明堂秋居總章冬居玄
堂又列大廟左右以配十有二月而使其每月遷徙往
來無定所哉天子所乘之車不過五輅或祀天或卽位
或田獵之事取其所宜則有之若車馬旂章衣王必欲
四時各一其色所食各一其味所用各一其器不亦失
之大拘忌耶噫漢去古未遠故諸儒之得於傳聞者尚
多古人善政但以己意證訂附會不免爲見聞所局而

可訾議者亦不少耳善觀月令者能別純訾而於古人
順時之意實可會而通矣

明堂位辨

成王幼周公為冢宰攝政以王命賞罰天下何嘗去北
面之禮而居非常之位哉明堂乃曰周公朝諸侯于明
堂之位天子負斧依南面而立又曰周公踐天子位果
如是則周公居尊矣魯謂周公如果有是乎金縢曰武
王既喪管叔及其弟流言於國曰公將不利於孺子公
乃為詩以貽王蔡仲之命曰惟周公位冢宰正百工群

又流言繼以蔡仲克庸祗德周公以為卿士乃命諸王
邦之蔡書曰公作詩以貽王乃言命之王而後封仲於

蔡周公曷嘗負斧依南面而立當時以為天子哉以周
公為天子則成王何以處此周公特輔政耳群叔且有
不利之言使實踐祚而朝諸侯豈特群叔流言已哉謬
之甚也又曰以周公有勲勞于天下封周公於曲阜地
方七百里命魯公世世祀以天子禮樂此文謬亂之甚
者予嘗辨其不然矣魯昭公曰吾何僭哉子家駒曰設
兩觀乘大輅朱干玉戚以舞大夏八佾以舞大武皆比
天子之禮也觀春秋書初獻六羽書郊書望書新作南
門新作雉門及兩觀無非惡魯人之僭天子所謂禮樂

征伐自諸侯出也何得謂魯用天子禮樂蕪虞夏商周之制也孟子以魯儉於百里彼乃以為七百里周書以唐虞官百夏商官倍彼則以有虞官五十夏后官百戾經違古莫此為甚至其大可恠者乃曰魯之君臣未嘗相弑也天下以為有道之國其果然乎夫春秋一書魯只十餘君隱為威新弑子般閔公公子赤皆戕於亂臣昭公哀公皆見逐十二公之中相弑害已如此而謂未嘗相弑何也蓋彼未嘗觀春秋故妄說至此後世不察乃援以為禮經其謬亂又何如哉

王制

論古帝王之制必有文獻可證斯可以信今而傳後也孔子欲言夏商之禮而杞宋不足徵正以文獻為不足耳孟子欲言周制而諸侯已去其籍其詳不可得而聞焉可見王制之書古無有也其作始於漢文帝令博士諸生采輯古典而附益之也何疑哉今觀其書言爵位則采孟子之文言官則采左氏之文言巡符則采書之文其餘雜以公穀等說縱使於諸經傳一無所悖尚不可以語周之成書也况其雜亂牴牾不可勝言耶夫孟子以天子一位公一位侯一位伯一位子男同一位凡五等彼則分子男為二位而不及天子孟子以君一位

一卿一位大夫一位上士一位中士一位下士一位凡六
 等彼則不言君之位而惟五等此其等位既以異矣其
 餘則皆孟子之全文也又以大國次國小國無異制而
 皆有上士七十二人若諸侯上士七十二人則中士下
 士又當何如吾恐一國之內安足以祿養之也謂四海
 之內九州州方千里州建百里之國三十七十里之國
 六十五十里之國百有二十九凡二百一十國并九州
 計之則為千七百七十三國周制諸侯已不可知矣其
 見於春秋者并附庸不過百八十國見於左氏傳不過
 倍加之爾借謂僻陋小國未嘗盡見於經而又或見侵
 於強大恐亦未必如其所傳之數也天子之縣內方百
 里之國九七十里之國二十有一五十里也國六十有
 三凡九十有三國古者畿內不以封建諸侯雖有公卿
 采地而謂之百里七十里計九十有三國也有是事哉
 謂天子使其大夫為三監監於方伯之國國三人古亦
 何嘗有三監之名乎惟周封武庚於商慮其煽亂乃命
 管叔蔡叔霍叔監之安得謂國各有三監而謂其為古
 之制乎此亦因周禮有立其監之語而推演之亦安必
 其為天子立監之定命也又謂天子諸侯無事則歲三
 田無事而不田曰不敬夫田狩之舉雖乘農隙以講武

然天子一日二日有萬幾勞民不暇果何時得無事也
文王不敢荒於遊田至於日昃不遑暇食而謂之無事
不田曰不敬而且以不敬歸之乾豆賓客君庖之需吾
又不知蒐田獮狩之禮果何爲而設此也謂諸侯初則
禘禘則不嘗夫禘之爲祭大祭也王者當禘其祖之所
自出乃謂之禘春秋書皆譏其僭也何得爲諸侯之祭
乎若指虞夏之制固如是恐亦不至以天子之祭爲諸
侯之祭也已然則古制之善雖賴此以存者不少孰知
皆孔子之無徵也孟子之不聞也則又安必爲古之制
哉况所記與諸經傳多相背馳而必欲執此爲古制亦
何以信其無也耶至雜之爲禮經而謂爲孔子所定之
禮則謬食甚矣

魯僭禮樂

禮記曰成王以周公有大勲勞於天下故賜魯世祭以
天子之禮樂或曰此魯惠公時周平王命史角賜以郊
廟之禮故史角留於魯要之魯用天子禮樂謂其出於
天子之賜者皆非也夫武王未受命至成王時周公制
禮作樂而教典大明人咸知名分所在不敢僭踰乃公
力也豈有周公方薨成王遽以天子禮樂賜魯卽大壞
周公之典禮乎誠如是則周公謚當何稱葬用何禮必

王而後可也然廟謚曰公葬禮亦公天子禮樂何用哉
成王非庸君伯禽非庸臣畢公召公非庸相必不爲此
悖禮亂常之事以啟後世僭竊而導之以亂階也或疑
非成王時是矣謂平王賜惠公也亦豈然哉其意以治
朝賢君則典禮不紊而衰世庸主則賞賜濫行故疑在
平王之世獨不思周轍雖東魯在當時不過爲次國耳
大國如齊楚晉宋敵國如鄭衛陳蔡設周平王以私意
厚魯而各國豈肯嘿然而已乎又肯以上世無功德而
甘處弱魯後乎以晉文之霸業襄王藉其功以反正至請
隧則曰王章也未有代德而有二王亦叔父之所惡也
惠公於平王何有哉然則孰賜之也曰未嘗有賜之者
魯自爲之也孔子曰天下有道禮樂征伐自天子出天
下無道禮樂征伐自諸侯出蓋十世希不失
矣此聖人所以正名分懼亂賊而作春秋也惟名分一
有不正禮樂征伐不出於天子故諸侯僭擬相仍冠履
倒置而春秋書禘書郊正以見魯之僭用禮樂云爾歟
後乘大輅載弓矢作丘甲設兩觀並用天子禮樂其勢
乃至此極豈惟魯哉晉用六軍僭天子之軍也晉人曰
以寡人之未禘祀僭天子之祭也甚者吳楚乃僭稱王
而無所顧忌矣苟不明春秋書郊書禘之旨而直以魯

之禮樂有所賜為榮則晉之六軍禘祀亦有所賜乎此所以謂成王平王之賜二說皆非也或者又以魯頌有云龍旂承祀六轡耳春秋匪懈享祀不忒皇皇后帝皇祖后稷然則魯人之所以頌美僖公者亦非歟曰魯僭如禘已非一日後人又皆安常習故莫覺其非以為君之功德而頌美之矣借日出於天子所賜其於僖公功德何與也觀春秋書公會齊侯於淮以見僖公服楚之役而頌乃謂淮夷卒獲則詩人之頌果可盡信否乎噫孔子於詩之魯頌則存而不刪春秋於魯之如禘咸筆而不削惟合詩與春秋並觀之則漢儒記禮之謬不待辨而見之矣

諸侯專征

天子握命討之權諸侯無專征之義諸侯專征大無道之世也謂諸侯賜弓矢得專征伐孰為此說耶毛萇釋詩孔安國釋書鄭康成釋禮杜預釋左氏皆有是說焉諸儒皆有是說宜必有所見矣孰知是說一倡適以啟僭亂之萌哉惟辟作福惟辟作威臣如有作福作威則害家亡國之道也凡人臣行一爵賞施一刑罰不由上命則有專作威福之罪况征伐大事天子重權諸侯方得弓矢之賜即可專之乎諸侯專之則非有道之天子

矣天子有道則人不得而專也稽詩書之訓可辨矣仲
康之世夏少衰矣如嗣侯之征胤和書謂之嗣征史官
嫌其若嗣侯之專征必曰嗣后承王命徂征有周之盛
獫狁猖獗矣周王爲出車之詩命將以討獫狁而南仲
之令衆也乃謂自天子所謂我來矣可見治世明主必
不以征伐之權假人也迨東周無政日以凌遲諸侯始
僭亂妄相侵伐不由王命至於叔季大夫執其權矣故
聖人傷之曰天下有道禮樂征伐自天子出天下無道
禮樂征伐自諸侯出蓋十世希不失矣自大
夫出五世希不失矣深痛周之失政一至此也於是始
作春秋初則述諸侯之僭中則譏大夫之專也奈何謂
諸侯可得而專乎彼諸儒之見或以弓矢爲征伐之物
弓矢賜于天子則征伐即可專矣不知古者諸侯有大
功天子賜之弓矢及圭瓚蓋殊禮也賜之圭瓚也使得
爲鬯以祭先也賜之弓矢也使得以待王命征不庭也
故王制曰諸侯賜弓矢而後征伐謂之而後未嘗不本
於王命也安得遽謂其得專乎哉晉文侯有攘戎之大
功平王賜之弓矢作文侯之命未嘗有專征之語彤弓
之詩亦以錫有功之諸侯未嘗有專征之命也蓋諸儒
不究詩書之旨特因王制之語而失之故耳况春秋一

經書征書伐書滅書取書入書戰書圍書討無非罪其
 無王命而擅興師也若有弓矢之賜即可出征則當時
 王室弱而諸侯強欲弓矢之賜也何難哉得賜弓矢之
 國即可專征春秋之戰皆義戰而敵國亦可以相征矣
 此所以諸儒之說倡而後世恃強跋扈皆得藉口實而
 啟僭亂之萌也豈小小哉或曰史記崇侯虎譖西伯於
 紂紂囚西伯于羑里後紂赦西伯賜之弓矢斧鉞得專
 征伐于是伐崇作豐何也曰崇固當伐而命之伐者必
 紂有是命也向使紂無是命文王一得弓矢之賜即敢
 擅伐崇密以谗譖已之怨而紂豈能容之乎或曰左氏
 嘗載管仲之言曰昔召康公命太公且曰五侯九伯汝
 實征之此言又何也曰太公之賢使有王命得征伐五
 侯九伯可也何嘗使不公得以專之乎若晉文侯之子
 孫恃其先世得弓矢之賜齊太公之子孫恃有康公之
 言皆可以專征諸侯是乃周成王平王教之僭而導之
 亂孔子有道無道之言亦不足信也已通于帝王大綱
 紀者慎毋惑於諸儒之說

五至三無

嘗誦孔子閒居篇辭若與論語不類釋其旨淵乎微矣
 可以神明未可以意識測可以默體未可以言說盡也



及體會久之乃知聖訓雖浩無涯涘而流派脉絡實出一源是故志之所至詩亦至焉詩之所至而禮而樂而哀亦罔不至焉然則詩禮樂哀之皆至謂其一源于志也非歟樂主聲也而無聲禮主體也而無體喪主服也而無服可謂至矣究其所起無聲之樂氣志不違無體之禮威儀遲遲無服之喪內恕孔悲是五至悉起于氣志謂其源于志也非歟天無私覆地無私載日月無私照奉斯三者以勞天下可謂無之至矣然嗜欲將至有開必先天降時雨山川出雲而奉三無私一出于清明在躬志氣如神謂其德參天地者一源于如神之志也非歟可見志根于心發言爲詩履之爲禮樂之爲樂志之爲哀總之爲性情之德一也雖曰禮也樂也哀也皆以無爲至而三無不越五至外也天地日月其覆載照臨至公無私而奉三無私之神志與天地日月同歸於無也明矣則是無也豈無無亦無之謂乎噫神本無方如春夏秋冬之運於天如神氣風霆之載於地瀰漫六合化生百物孰得而私議之哉氣志在人至於如神不可測識擬議非孔子從心所欲不踰矩無可無不可者其誰能之然揆厥所自一根乎志學于茲益信雖然匹夫不可奪志一念顛精且能貫金石通鬼神矧至聖于

志之所至精神融結如鳥覆卵字化翼飛不可窺測此
所以謂之如神而聖不可知也故曰哀樂相生正目而
視之不可得而見也傾耳而聽之不可得而聞也雖志
氣塞乎天地惟其無私所以謂之無惟其無也此所以
謂之極至無以加也詎知是無也在孩提不學不慮在
聖人不思不勉一毫人力不與哉非無樂也樂在其中
不知手舞而足蹈也何聲之有非無禮也忘于禮者之
於禮也無不中何體之有非無喪也墟墓興哀道堯死
傷為我心惻何服之有要皆本於如神之志充塞天地
不期至而自至也特患志之有未至耳惟志至焉則五
志三無如鼓荅桴如鍾應槌一出乎天性自然即喜怒
哀樂未發之中發皆中節之和是也謂之未發不覩不
聞而非有也故樂無聲禮無體喪無服也謂之發皆中
節莫見莫顯而非無也故詩禮樂哀之相生不可得而
覩聞也真志學者惟戒懼乎不覩不聞吾慎吾獨而中
和位育乃其所自至者極之為天載無聲無臭而中庸
贊其至也視彼專志以求虛無者奚啻天淵所以學莫
先於辨志

人者天地之心

天高地下庶物化生類聚群分不可數計韓退之原人

以夷狄鳥獸總歸人類人最靈秀不過庶類中之一耳
雖參贊天地惟至誠能之禮運篇乃謂人者天地之心
五行之端食味別聲被色而生者也是人人皆天地之
心矣果天道陰陽專指氣言地道柔剛專指質言人道
仁義專指心言乎哉蓋太極兩儀分爲五行五行滋爲
五味感爲五聲形爲五色而色聲臭味又區別萬殊人
在天地間未有不食味別聲被色而生而別有所謂人
也然其所以爲天地之心者豈離色聲食味外別有所
謂心乎何也心不在焉視不見聽不聞食不知味與草
木鳥獸夫復何異是故人之爲人莫不具腑臟肢體以
成身具靈明知識以成心形色天性渾身皆心而其
則發於耳目口也凡有血氣者同得萬物之味以爲食
而辨其味者非人乎五味不可勝窮苟匪人焉味亦莫
知其甘旨不過克腹之需已矣同得萬物之色以爲視
而辨其色者非人乎五色不可勝窮苟匪人焉色亦莫
知其美惡不過娛目之具已矣同得萬物之聲以爲聽
而辨其聲者非人乎五聲不可勝窮苟匪人焉聲亦莫
知其邪正不過悅耳之資已矣即此觀之人之爲人而
異於庶類者爲其有是心也然亦止爲人之心耳謂爲
天地之心何歟夫人之心非塊然血肉之謂也天地靈

明之氣充滿宇宙惟人獨稟其精英寂然廓然浩無涯
淡隨感隨應惟變所適方寸靈覺與六合神明渾淪無
間故人之聽聲存乎耳所以能聽者天地之聰也視色
存乎目所以能視者天地之明也食味存乎口所以能
嗜而化爲精神者天地之變化也是心之靈覺寓於形
氣流通兩間卷舒陰陽往來今古巨囊寰宇微透毫芒
廣博淵深莫測其底止一人如是人人皆然一世之人
如是世世皆然此所以人爲天地之心也宜乎人人皆
爲天地立心矣其如人本大而咸自小何哉五色令人
目盲五聲令人耳聾五味令人口爽衆慾交攻令人馳
騫奔軼不可救藥間有知自檢飭而操存之者收視返
聽節食持齋未能自見本心洞晰天地雖坐忘坐馳彼
善於此莫能究竟根源卒與草木同朽腐然則天地之
心竟漸滅殆盡乎彼色聲臭味人縱欲絕之終有不能
絕者詎知聲投乎耳耳本無聲惟不爲聲所引焉則雖
聽以人之心實天聰也色過乎目目本無色惟不爲色
所誘焉則雖視以人之心實天視也味入於口口本無
味惟不爲味所奪焉則雖嗜以人之心實天地爲之變
化而滋養之也斯人也浩氣充塞天地道心脗合乾坤
列爲三才參爲三極天地且賴以位也非天地之心而

何可見心不離乎色聲臭味實超然聲色臭味之外此
心之所以爲心也人雖產于天地靈於萬物實天地萬
物之主宰此人之所以爲人也人可因聲聞食色牯亡
天地之心哉

射義

古人於射義必設侯以命中卽詩豳嗟章所謂終日射
侯賓筵章所謂大侯旣抗是也漢儒記作射義乃曰射
侯者射爲諸侯也侯取諸侯之義已失之矣鄭康成因
之註周官司裘曰謂之侯者天子中之則能服諸侯諸
侯以下中之則得爲諸侯不亦愈失而愈遠哉夫天子
之於諸侯其初皆其兄弟子姪其後繼世或祖父之列
其在異姓必皆功德之後而爲甥舅之國故天子待之
不曰伯父叔父則曰伯舅叔舅所以親之敬之賓之友
之而後責之以臣順豈敢於大射禮取射諸侯之義而
待以禽獸之類哉周襄弘嘗以諸侯不朝乃設貍首射
之貍者不來也將以警不來者晉人怒殺襄弘而愈不
服况無故而不以人道待諸侯耶且天子中之則能服
諸侯蓋天子固已服諸侯矣奚必射之中而後服也使
萬一不中則不能服諸侯矣奚可哉天子建萬國親諸
侯使之世世守而勿失乃謂諸侯以下中之則得爲諸

侯則雖無功德而但於大射一中便得列土而封建乎
鄭氏之說蓋亦祖射義而不知其非者也射義曰射中
則得爲諸侯不中則不得爲諸侯觀其下文猶以諸侯
貢士於天子天子使射中者得與於祭則君有慶而益
地不中者不得與於祭則君有讓而削地得爲諸侯者
以有慶也不得爲諸侯者以有讓也即天子之賞罰諸
侯惟在射之中否揆之書云五載一巡狩群后肆朝敷
奏以言明試以功車服以庸孟子云入其疆土地闢賢
俊用則有慶土地荒蕪培尅在位則有讓已不相合况
鄭氏因其說諸侯以下射中則得爲諸侯尤不可也昔
晉侯齊侯相與投壺晉人謂寡君中此則爲諸侯師齊
人謂寡君中此則與君代興皆中之識者謂晉人失辭
晉固爲諸侯師矣何待中壺爲雋耶自是齊人與晉于
戈相尋投壺之語啟之耳以此知古人射侯必不取諸
侯之義天子諸侯中之必不如鄭氏之說明矣射義一
篇雖中多古典而其大義已乖何可以垂訓也况射特
六藝之一耳稷契伊周末聞其能射也羿逢蒙由基之
徒皆射絕天下果得爲諸侯者皆若人乎今而曰諸侯
歲貢士於天子天子試之其容體比於禮節奏比於樂
中多得與於祭不然則不得與選士以祭殆其然者但

禮樂不實有於內而徒行於弓矢之間恐古之選士有不然者惟周禮鄉大夫獻賢能之書退而以鄉射五物詢衆庶則有之何至如射義進爵繼地蓋由於射也耶或曰古者不以射取士何謂侯以明之乎曰書謂欽四隣庶頑讒說若不在時侯以明之撻以記之書用識哉欲並生哉蓋以四鄰之臣若不在庶頑之重罪者則猶可撻拭而勿棄之侯以明其藝撻以記其過書以識矣非庶幾與之並生可見試以射又撻其過侯與撻並施而據此爲古之人選士之法也可乎哉漢儒據此以証二禮信哉愈失而愈遠也已

昏義

天子聽男教后聽女教天子理陽道后治陰德天子聽外治后聽內職故天子之與后猶日之與月陰之與陽相須而成此不易之理也昏義曰古者天子后立六宮三夫人九嬪二十七世婦八十一御妻以聽天下之內治天子立六官三公九卿二十七大夫八十一元士以聽天下之外治據本文亦無可疑但後儒謂夫人嬪世婦御妻即天子六宮中有名位之妾媵夫以天子之尊臣妾天下豈百二十人之足多哉但以理揆之一人御衆女爲古帝王定制其不可疑甚明奈何鄭康成又註

爲當夕之說謂后當一夕二夫人當一夕九嬪當一夕
二十七世婦當三夕八十一御妻當九夕每十五日而
一周是說也何其鄙悖謬妄一至此極哉夫易之剥六
五貫魚以宮人寵非謂天子自后以下所以備數宮中
者不無其人但大昏之義載爲定數非徒當夕之說甚
悖於理而以一人御衆女士帝王必不以此立教也况
內之夫人九嬪世婦御妻與外之公卿大夫元士其數
一一相配雖以名義言之不應如此之舛而有名位者
既定爲百二十人則其餘服役又不知當有幾千百人
矣或以昏義本文旣無可疑而世儒之說又不可信將
以何者而折衷之哉蓋天子統六官后統六宮特以陰
陽內外而別言之耳苟真知世儒與康成所說之非則
有三公必有三夫人有九卿必有九嬪有二十七大夫
必有二十七世婦有八十一元士必有八十一御妻合
一朝之外治不外乎六官而莫非天子之所統合廷臣
之內職不外乎六宮而孰非后之所統哉即後臣百僚
皆天子之命臣其妻莫非天子之命婦合百官朝于天
子所以輔天子明章天下之男教合百官之命婦朝于
后宮亦以助后明章天下之婦順也使天下之百官悉
敬承天子之男教則外和而國治矣使百官之命婦悉

敬承后之婦順有不內和而家理者哉以此言之則又何必夫人嬪與世婦御妻必為天子宫中有名位之妾媵而後可也嘗讀書有不邇聲色之訓中庸有去讒遠色之言是聖人於色荒惟恐防之不早乃於昏義以此垂訓萬世吾不信也噫即此推其餘漢儒釋經而經亡可勝慨哉

封建疑議

古今論三代封建之制惟孟子曰公侯皆方百里伯七十里子男五十里其大畧可據者如此質之武城列爵惟五分土惟三之說相脗合天子地方千里質之商頌邦畿千里之說無間然也王制封建之法則一徹于天子然曰四海之內九州州方千里州建百里之國三十七十里之國六十五里之國百有二十凡二百一十國天子之縣內方百里之國九七十里之國二十有一五十里之國六十有二凡九十三國九州千七百七十三國天子之元士諸侯之附庸不與以應周千八百諸侯之數定為畫一之法斬然不易何拘泥不通至此也夫以九州之地容千八百諸侯猶有近似者若如周禮大司徒建國之制則諸公之地封疆方五百里諸侯四百里諸伯三百里諸子二百里諸男百里職方氏凡千

里封公以方五百里則四公方四百里則六侯方三百里則十一伯方二百里則二十五子方百里則百男以周知天下夫以千里之地封公者四是四公各得二百五十里六侯各得一百六十六里十一伯各得八十九里二十五子各得四十里百男各得十里而男之國果止十里職方氏果與大司徒之說不相妨乎以職方言之雖海內之地止封六公九侯二十二伯五十子二百男地猶不足而周之諸侯果止於二百八十餘國而已乎若以大司徒之制言之春秋時有年表可考者止二十二國耳爲公者三爲侯者八爲伯者五爲子者五爲男者一是二十二國已去七千三百里矣而周果二十餘國而已乎是皆不通之說也柰何後儒必欲以周禮大司徒職方氏所載與王制孟子之說強而合之有曰於天子言千里者蕪軍賦而言之於諸侯言百里七十里五十里者獨舉軍制而言也於天子言萬乘者以賦法通率也於諸侯言千乘者蕪軍賦而言也於諸公言五百里諸侯言四百里伯言三百里子言二百里者包山川土田附庸於疆理也於諸男言百里者獨舉出軍賦之封疆也似乎不相倍矣然公侯之封如此其廣則折海內九千里之地不足以容數十國而名山大川方

數百里者果可以一國包之封疆之內焉否乎有曰周禮封疆方五百里徑只百二十五里方四百里者徑只百里方三百里徑只七十五里方二百里徑只五十里方百里者徑只二十五里似與王制孟子不相倍矣然侯伯子之地雖已脗合而公之地多二十五里男之地僅得五十里之半况二十五里果可以爲國君乎有曰天子畿內方千里者開方實萬里也然則公侯方百里者開方則千里矣豈長則百里闊則一里之謂乎是皆求之不得其說故牽合傳會必欲強而通之而數說之齟齬不相合如故也噫以義揆之豈數說盡非耶蓋今之去古時已遠矣制已不可詳矣九州之地截東海以補西北萬里之幅幘猶相等也必曰公五百里侯伯三四百里則以今之地封三四十國而不足矣有是理哉惟孟子公侯皆方百里伯七十里子男五十里庶幾近之是故封疆雖有定制而山川土田附庸之錫則不在定數之中如魯頌曰乃命魯公俾侯於東錫之山川土田附庸曰泰山巖巖魯邦所瞻奄有龜蒙遂荒大東如大雅曰王錫韓侯其追其貊奄受北國曰告于文人錫山土田可見山川土田附庸則又天子展親報功之特典而不可以定制拘之矣設使天子盡以九州之地封

建諸侯而無餘則巡狩述職有當慶而益以地者果削彼國之地以益此國亦不論土地遠近爲何如哉立國之初封建以定繼世而王者欲以分封子弟必須滅他國而後可哉觀周襄王以陽樊温原攢茅之田錫晉文原人不服乃至興師以伐之亦以世守其地不肯遽從他人而山川土田猶有不屬諸侯封疆之內者在也要之九州廣狹本有不齊山川阻隔勢亦靡定安得盡如周禮畫疆分界若此其整齊耶孟子論井田曰此其大畧也若夫潤澤之則在君與子矣予於封建亦云然惟善考古者無泥於舊說而後可

周禮總叙

周禮一也古今論者不一是之者固未必天下之直是非而非之者抑豈天下之直非乎稽諸孔孟之言其是非可辯矣何也彼謂是書非周公制作也竊恐法制周密詳盡三代而下未有如此之盡美者孔子曰文武之政布在方策安知是書非其方策之遺乎若以爲盡出于周公之手也不惟封國建官中多可疑孟子曰諸侯惡其害已而皆去其籍豈籍去戰國孟子止得聞其畧秦皇焚禁書籍漢儒反得其詳也耶可見是書也在春秋時尚有存者至戰國而後漸滅無餘也已不然孔子所

謂方策果何所指孟子所謂去其籍者非周禮之類乎
意者漢雖承秦焚禁之餘然去古未遠故諸儒猶得以
習聞其說其體國經野大典宏綱未必非周家良法所
僅存者而摭摭東遷以後如戰國時制以雜亂乎其中
者豈盡無也耶况周歷八百餘載其禮制初雖定於周
公而沿革潤色時異世殊安知非東周之方策典籍又
安知非漢儒所補輯也耶噫讀周禮者于其是而真知
其為前代之所流傳于其非而真知其為後代之所雜
亂師其意不泥其迹周公之心法不即此而會通哉

周禮原委

賈氏正義云按書傳周公一年救亂二年伐商三年踐
奄四年建侯衛五年營成周六年制禮作樂所制之禮
即此周禮也漢興高堂生傳十七篇自高堂生蕭奮孟
卿後蒼戴德戴聖是為五傳弟子所謂十七篇即儀禮
也若夫周禮其出特後者馬融傳云秦自孝公以下用
商君之法其政酷烈與周官相反始皇禁挾書特疾惡
欲絕滅之故焚燒之獨悉是以隱藏百年孝惠除挾書
之律開獻書之路時有季氏上周官五篇復入于秘府
五家之儒莫得見焉孝成時劉向子歆校理秘書始得
列序著于錄畧然亡冬官一篇以考工記足之時衆儒

並出共排以爲非是唯歆年尚幼務在博覽乃知其爲
周公到太平之迹具在于此奈遭天下兵革並起疾疫
喪荒弟子死喪彼有里人河南緱氏杜子春尚在永平
之初年且九十能通其義頗識其說賈徽及子達大中
大夫鄭興及子大司農衆往傳其業又以經書傳記轉
相證明爲解其時議郎衛次仲侍中賈景伯南郡太守
馬季良亦皆作周禮解詁然猶有參錯同事相違二鄭
明理于典籍猶識周官之議存古字發微正讀鄭玄子
康成作周禮註多引杜子春鄭大夫司農之義以讚而
釋之焉然則周禮起于劉歆而成于鄭玄然孝存以爲
末世瀆亂不驗之書作十論八難以排棄之何休亦以
爲六國陰謀之書唯有鄭玄徧覽群經故能答林碩之
難作爲訓註使其義得條通焉其後唐大學博士賈公
彥又撰周禮疏五十卷是爲注疏云 猶粗通

周禮考

鄭氏曰周公營洛邑於土中七年作六典謂之周禮致
政成王以授之

王文中子吾視千載而上聖人在上者未有若周公焉
其道則一而經制大備後之爲政者有所持循矣
明道程子曰必有關雎麟趾之意然後可以行周官之

法度

橫渠張子曰天官之職須襟懷洪大方能包羅統貫規模至大若不得其心欲事事上窮究湊合使如是之大必不能也

藍田呂氏曰周禮直欲使無一物不得其所故其書無一言而非仁

朱子曰周禮一書皆是從容廣大心中流出 又曰周官徧布精密乃周公運用天理爛熟之書

崑山王氏曰六官治教禮政刑事上下四方覆藏宥密如天地四方之六合缺一不可大如六卿六遂六軍小如六牲皆六官合而後具如六出之花六瓣具而後花成缺一不可也一職脩可以扶顛持危撥亂世而反之正六職脩則天下大和萬物咸若矣 又曰周官物各付物如天地之化大之日星垂教河嶽效靈小之草木之一華一實鳥獸之一羽一毛靡不相對成文非物物刻而雕之 又曰周禮有必不可復者如后妃夫人與尸賓獻酬天子與邦君送迎揖讓是也至官府爲一體王后世子之動有式法寓兵於農取士以賢選用宦寺府史胥徒制馭諸侯四夷後世舍此無以爲治 又曰周官中有原兼官不別設官者有其官相聯不得不兼

者有平日不設臨事設之事畢復罷者皆使人以其所能用人以其餘力故事治而功不妨官設而祿不費所以善也

周禮本旨

古籍備載先代建置法紀獨周禮一書最為詳密是非存亡姑置無論然讀是書不可先有是非存亡之成心橫于胸臆惟依周禮究竟周禮俾一官一職明其司掌總其統屬多之若增一贅龐少之若缺一成數此亦未可以已意裁決之也須從書外洞見作者本意于六官源委透徹底裏自度可與周公面相質疑問難周禮全

書盡在我胸中經之緯之一無所眩然後度其時勢審其治體是非存亡灼然如燭黑白庶不為後人論議所撓亂矣不然徒逞意見是今非古移前補後祇見其妄也反以滋後生之惑也予甚闇陋于各經書不敢自衒小慧妄加刪補革易舊章或露管窺則直述所見以就正有道然欲于是書而提揭綱領晰其會歸尤為急務近世王明齋氏于周禮頗得肯綮鄙見多與之合又何必別自為說耶

天官冢宰天統萬物天子立冢宰以統御百官曰天官冢宰取其調劑邦治協于中和也大宰之職掌建邦之

六典以佐王治邦國小宰掌建邦之官刑以治王宮之政令宰夫掌治朝之法以正王及三公六卿大夫群吏之位掌其禁令其官屬凡六十皆王宮后宮之事冢宰無所不統宮政而下主宿衛及王之左右內宰而下主內政及后之左右膳夫主食酒正主飲宮人主宮室典婦功主女功內司服主衣服醫司主疾病圉有一事一物出于他門違于法式者俾王及后率由天道也其大府而下八職皆財賦之官而亦屬焉蓋九貢九賦九式已見于大宰小宰之文八政以食貨爲先欲均天下必自理財始萬物皆天物故宰致國用有大府掌出入之權百官府皆天職事皆天工故宰百官聽邦治而特司會一職總焉六十屬皆主在上之事天覆象也

地官司徒地載養萬物安擾地道也天子立司徒以安萬民徒謂統徒衆焉大司徒之職掌建邦之土地之圖與其人民之數以佐王安擾邦國小司徒掌建邦法鄉各掌其所治鄉之教而聽其治其屬七十有五俱主教養萬民士農工商四民盡乎民矣六卿多士故卿大夫之屬詳於教六遂多農故遂人而下詳於養市商也司市而下治商人之教工則見於冬官司保氏主輔王躬及教其左右司諫司救掌畿內之教也地之所生莫大

於土載師任地也土均均人平土也封人守畿封之土
虞衡主山林川澤之土門關守土者也倉廩土地所出
牧人畜養犧牲土所產也牛土畜六十屬皆邦本之事
也

春官宗伯春出生萬物宗尊伯長也天子立宗伯掌邦
禮以事神爲上報本反始亦反其所自生也大宗伯之
職掌建邦之天神人鬼地示之禮以佐王保邦國小宗
伯掌建邦之神位肆師掌立國祀之禮以佐大宗伯其
屬六十九秩序皆天所命天府奉若天道也大卜筮占
夢眠祲馮相保章聽命于天和同天人之際也典命典
瑞司服巾車司常禮之秩序也鬱人司尊彝司几筵行
禮之器也巫祝致禮之辭也諸史守禮之官也禮必有
樂大司樂教王世子及國子以禮樂者也世婦內外宗
教六宮以禮者也送死大事家人職器專其禮都宗人
治都惟宗禮家宗人治家惟宗禮鷄人春畜六十屬合
敬合愛春生象也
夏官司馬夏大也長萬物也天子立司馬掌邦政以平
諸侯正天下大一統也官以馬名兵所重莫有急於馬
者大司馬之職掌建邦之九法以佐王平邦國小司馬
掌凡祭祀會同饗射師田喪紀掌其事如大司馬之法

其屬六十有三大司馬主天下之大事量人邊師制畿
 封國也職方氏分職也都司馬家司馬簡稽鄉民也司
 勳司士諸子進賢興功也皆大政也大僕節服氏格王
 正事也司士正朝儀之位正朝廷百官也九伐正萬國
 也服不氏而下正禽獸也兵司馬之用器則有司甲司
 兵司弓矢馬司馬之乘畜則有馬質校人戰司馬之事
 戎僕主軍政之御司右主車之右環人挈壺皆有事于
 戰者也兵莫大於自衛守險虎賁旅賁備輦轂以衛王
 掌固司險掌疆設險以守國也兵莫大於防微杜漸懷
 氏訓方制治于未亂匡人禫人消息于未萌也它若司
 燿主火夏氣也小子羊人主供羊夏畜也弁服首服夏
 象也六十屬萬物相見品彙咸亨之象也乃司馬辨論
 官材進士之賢者于王詔爵詔祿詔事奠食司士掌其
 版王制記之矣

秋官司寇象秋氣嚴肅收聚斂藏乎萬物天子立司寇
 掌邦刑義以正萬民也大司寇之職掌建邦之三典以
 佐王刑邦國詰四方小司寇掌外朝之政以致萬民而
 詢焉士師掌國之五禁以佐右刑罰其屬凡六十有一
 司刑以定臯司刺以參伍赦宥掌囚以拘繫司厲以收
 孥掌戮司圜以收教皆刑官遂士縣士方士誅士朝士

各掌其地之刑也司隸禁殺戮禁暴氏野廬氏蜡氏雍氏萍氏司寤司烜條狼脩閭街枚主巡察布憲主警戒司約司盟主結信皆禁于未發刑期無刑也夫殺以止殺豈徒刑戮之是務乎司民掌民歎屬若曰王刑者民之司命以生生爲心期于治而已殺敢不慎乎大行人掌邦交之禮又主以刑詰四方朝大夫都則都士家士主以法則馭圻內諸侯冥氏而下十二官刑及禽獸也職金五行秋屬金大金畜也六十屬皆主裁物之過各正性命之象也

冬官司空大宰事典曰以富邦國以生萬民冬者萬物之所終也萬物成終必歸其根亶空土也司空掌冬之天下之事所由成故命曰冬官空之言空也相天下之勢所空缺而脩治補助之是冬官之義也冬官官屬其亡久矣漢孝惠除挾書律時季氏上周官五篇復入秘書五家之儒莫得見焉至孝成時劉歆校理秘書始得列序著于錄畧亡冬官一篇以考工記足之夫工特司空之一耳冬官詎止考工已耶或謂各屬混于五官之中即欲于五官中摘其有關冬官者以補其缺是謂冬官原未亡也或欲象天文有土司空土工二星擬其屬必有掌大均之事者有器府星擬其屬必有掌器府之

事者諸如此類皆補於五官之外也二者皆有定說孰
敢必其然哉考工記雖不足以盡冬官而工其屬也然
則六官闕一如之何孔子嘗嘆五猶及史闕文吾其闕
之而已矣

周

是之者則曰

周公致太平之書

真聖人所作

禮

王道之極

聖賢制作之書

是

非之者則曰

戰國陰謀之書

瀆亂不經之書

非

末世紛亂之典

成周禮財之書

周禮是非

周官書列於經幾千百年矣戾於經而列於經此予所以不得不辨其非也予豈得已哉賈氏曰六經禍於秦惟周禮最後出也以始皇特惡之故禁絕加嚴也此理不然北宮錡問周室班爵祿之制孟子謂諸侯惡其害已而皆去其籍可聞其畧而不聞其詳方戰國時周室尤存諸侯強大不稟周制已滅故去其籍也是周公所制之典夫子所正之經已不傳於世也故雖孟子博學大儒不得聞其詳何待秦之禍而後亡始皇禁絕之嚴故後出乎豈當時有周禮而孟子不見之乎孟子且不見周禮漢世焉得而有之有之則非周公之舊後儒爲之章章矣然秦漢去周末遠使其洪儒碩學請聞周禮之舊作爲一書使後知所本又何幸耶故雖非周公之親筆謂之周禮亦可也今乃不然所載之典大抵以衰世之制爲盛世之典其背理傷教甚衆以理度之特出於漢儒之才高而不深於道者歟所以不能使人盡信也夫成周之制語其最大者莫若建都也又莫若封國也又莫若設官也倣其言皆與他經不合言建都之制則戾書洛誥召誥之旨言封國之制則戾書武城與孟子之說言設官之制則戾書周官之六典此其事之最

大理之最明而皆與古書戾則其小者可知矣

建都之制

周人求地中以建國畿方千里故鄭氏曰周公居洛營邑於土中七年使成王居洛邑其說信矣然大戎作難平王始遷居洛邑蓋前此未以為都故也然則謂成王居之何哉若但測景求地中而不居顧謂之王畿王國寧有是理哉

大司徒以土圭之法測土深正日景以求地中由是建

王國制其畿方千里土圭之法不見於地經惟見於周

禮大司徒及典瑞王人之官以是測日景長短求與土

圭等蓋謂周公營洛邑之事鄭氏謂周公居洛營邑於

土中七年使成王居洛邑夫周公營洛邑未嘗與成王

居之也至犬戎之難西周已喪平王始遷居焉今指洛

邑謂之王國王畿即謂成王居之豈不戾乎若但測

求地中而不居則不得謂之王畿王國也此其說失之

明矣且王者之居必求地中何耶古之聖人定都建國

特取其便於時爾堯都平陽舜都安邑文王居豐武王

居鎬何必其地之中耶賈氏謂五帝以降惟湯亳得地

中堯舜雖不得地中而政令均天下治者以並在五嶽

之內周公之岐鎬處五嶽之外故周公東居洛邑此因

鄭氏而愈失之也堯舜文武之治若不施仁政於民則

居地中何益徒居地中與五嶽之內即能令政教均天

下治者陋儒之見也且先儒謂今潁川陽城為地中故

置中表若然周公何不即都陽城乃營洛邑乎洛邑去陽城亦遠矣既求地中而不以爲都何耶又曰日南則景短多暑日北則景長多寒日東則景夕多風日西則景朝多陰說者謂凡日景於地千里而差一寸南表千里景短一寸北表千里景長一寸有是理乎若千里即差一寸萬里乃差一尺也此已不可况謂東表去中表千里晝漏半中表景得正時東表日已跌矣是他於日爲近遠故得景夕西表去中表千里晝漏半中表景得正時西表日未中是地於日爲近西仍得朝時之景况甚不可也日月麗天萬里同晷纔去千里之間地中何正時在東之景已夕在西之景方朝若然是夏日之至晝漏方半東去地中千里之人以西方之朝爲夕西去地中千里之人以東方之夕爲朝使相去數千里之外則當以晝爲夜以夜爲晝矣即雖蠻夷之地窮日際月窟之所居亦不至是昔堯命羲和宅嵎夷命羲叔宅南郊命和仲宅昧谷命和叔宅幽都皆以觀日景之出入短長陰陽氣候之偏正未嘗聞四方日景之異如此又曰天地之所合也四時之所交也風雨之所會也陰陽之所和也夫謂之中國居天地之中者以外有東夷南蠻西戎北狄之爲中也其蠻夷之地或相蓊蓊或相什

百在四夷之域廣狹自不同中國之內但止一洛正為天地之所合四時之所交其果然乎故營王邑者欲居天下之中使四方道理均此則可矣而謂天地必合於此四時必交於此恐無是理也况於風雨之會陰陽之和無亦在人君德政應天心如何耳但居洛邑以求風雨之會陰陽之和空言也此無他蓋見書召誥有王來詔上帝自服于土中之言故作周禮者衍其說也不知書所謂土中者但謂道里均耳使周公必以土圭測景求地中則書載營邑之事詳矣豈得不言今觀洛誥之書特云卜澗水東卜瀍水西何嘗如大司徒及諸儒之說學者苟知成王未嘗營居洛邑之說自可知其非也

封國之制

周禮封國之制先儒固有能言其非者俗學又為之委曲求通以誤後世亦不能無辯焉夫子以大國為千乘之國又曰安見方六七十如五六十而非邦也者至孟子答非宮鎡及慎子之言與武王列爵分土之制無少差異則大國不過百里次七十里次五十里周法固然也又曰今滕絕長補短將五十里也則孔孟非特聞武王周公之制蓋親見當時之諸侯則然漢儒作王制亦同獨為周官書者以公五百里侯四百里伯三百里子

國書系 卷十三 二十一
二百里男百里與書論語孟子禮記之言並戾無有疑
其爲非者何也陋儒鄭氏釋王制方曰武王初定天下
更以五等之爵增以子男而猶因殷之地以九州之界
尚狹也周公致太平斥九州之界封有功諸侯大者五
百里最小者百里蓋據大司徒之文夫堯舜夏商周之
地不過九州攷周職方掌天下之圖無以過於禹貢之
域禹之疆域東漸于海西被於流沙朔南暨殼敎夫既
已窮于海至于流沙將何所斥廣哉借能斥大邊境取
夷狄之地不亦可增封於內此甚不然也或曰諸侯之
地當如孟子之言至開方之說則如司徒所記故其言
封疆皆言方者開方之法也王制云方千里者爲方百
里者百若據實千里而言則不得有方百里者百亦開
方法也此百里之國開方得百里之國者四公當爲四
百里此言五百里者錫之以附庸故也伯七十里開方
得七十里之國者四則爲二百八十里舉成數可爲三
百里子五十里開方得五十里之國者四故爲二百里
據此說亦非也以公侯之地開方已不得五百里之數
又益之以附庸若公侯有附庸則自伯而下亦當有附
庸合以公侯則又不合於伯子矣况子男同五十里今
以子五十里開方得二百里而男開方止於百里何哉

說者又強通以爲男實有二十五里何所據而云然王制有曰古者以周尺八尺爲步今以周尺六尺四寸爲步古者百里當百二十一里六十步四尺一寸三分然則孟子周官里數之不同抑尺之有短長耶借謂尺有短長其百里當後之百二十一里有奇周官祇但云諸公之地封疆方百二十里何至相去數倍遼遠之甚乎是又不可也不知爲此異說者蓋漢儒見周之衰諸侯相侵吞滅小國開疆拓地至於數百里之廣乃以爲周制乎子產曰古者列國一同今大國數圻若無侵小何以至焉孟子曰周公之封於魯爲方百里者五又曰今海內之地方千里者九齊集有其一觀此則春秋之六國非復一同也戰國時魯乃五百里齊乃千里此則周官書執以爲據也又職方氏曰千里封公方五百里則四公方四百里則六侯方七百里則七伯方二百里則二十五子方百里則百男皆非古之制不可信也故曰舉衰世之典而爲盛時之制此類是也

建宮之制

周禮事之最大者莫如建都封國之制予旣辨其非古矣然未爲甚也至其言設官則甚矣據書周官稱唐虞官百夏商倍之繼之曰仰惟前代時若訓迪厥官立太

師太傅大保茲惟三公少師少傅少保曰三孤而後及於六卿周之官制可擬惟此成王仰惟前代則大率依唐虞夏商之制耳今觀周禮乃無三孤三公之官不誌其大而誌其小於理安乎為之說者乃曰三公之尊坐而論道故不列於官謬說也成王言六卿所治之職何嘗以配天地四時今以冢宰曰天官而天事反在春官乃曰天取兼總之義夫天之至尊惟萬乘可稱曰天王曰天子豈以人臣而得稱天乎司徒謂之地官尤無意義古者司徒掌教教以人倫今乃掌上地之事則是司空掌土地非司徒掌教也宗伯掌禮謂之春官春者物之生五行以象仁今謂之禮豈主教也哉司馬掌兵而謂之夏官夏方物之盛反用兵乎惟司寇掌刑謂之秋官猶可矣司空掌上謂之冬官又無理也使成王有職於天地四時則書言之矣書既不言所取又無義漢儒臆說可知也又小宰謂天官以下其屬各六十計為三百六十官說者謂象日月星辰之度今觀自太宰至履人官凡六十有三自大司徒至瞽人官凡七十有九自大宗伯至宗人官凡七十有一自大司馬至冢司馬官凡七十自大司寇至冢士官凡六十有六計五官之屬已二百五十有二而冬官尚不與小宰之言自戾矣且

其趨走之吏僕隸之職皆列於官內小臣內監男巫女
巫之類何為者耶甚者國氏去龜鼈壺涿氏除水蠱柞
氏攻草木而方相氏蒙熊皮黃金四目為一官乎瀆亂
不經甚矣然此雖不可猶可強道也若乃鄉官之制五
家為比有下士為比長五比為閭有中士為閭胥四閭
為族有上士為族師五族為黨有下大夫為黨正五黨
為州有中大夫為州長五州為鄉有鄉一人謂之鄉大
夫六鄉之民不過七萬五千家耳今每鄉卿一人中大
夫五人下大夫二十五人上士一百二十五人中士五
百人下士二千五百人一鄉之中自鄉至下士凡三千
一百五十六官合六鄉計之則有萬八千九百三十六
官不知七萬五千之家何以供之也雖盡土之所產賦
之所入不足以給之至遂人言六遂之制又云五家為
鄰有鄰長推而上之為理為鄙為都為縣為遂為異於
鄉之制併六家計之亦萬八千九百三十六官六遂又
能供之耶合鄉遂之數則為三萬六千八百七十二官
據孟子王制諸侯而下士比上農夫食九人使六鄉六
遂之官皆食諸侯下士之祿則三萬七千八百七十二
官蓋食三十萬有餘人鄉遂之中耕者凡幾萬人乃食
三十萬不耕之人乎况又不止皆食諸侯下士之祿况

又鄉遂之外他官至衆內而三公三孤之屬外而諸侯之臣不知其幾借謂堯舜之世事簡而建官少周之世事煩而建官多夏商不過倍唐虞之制周人亦不過倍夏商之制何得與夏商相甚乃數萬倍耶蓋彼但見成周建官之多而不計其所以誕謾至此世儒酷信之不亦傷乎王氏曰王畿受天下財賦不當以財不足祿爲疑不知官冗至此祿之當以何術世之陋學隨人東西未有如漢鄭氏近世王氏也作周禮者正以欺若人耳

內宰之職

周人以辯宮九嬪九卿之教責之內宰然乎否乎夫以宮禁之密房帷之事非外官

所治也女子未嫁教以婦言婦德婦容婦功者女師之事也今內辨史獸術之類而備以有司社以陰禮教皇后及九嬪無是理况謂之婦織經組訓之事內宰其果能教乎

夫男女之別正家所先先王以宮掖使令掃除之事不可無人於是不得已而用奄官以爲之防未聞使外官治內事也后夫人以下欲無驕僞無嫉妬無讒言無私謁在人君正身以率之耳不正身以率之而使內宰之徒教之非也舜以匹夫妻帝之女使執婦道於虞氏曰嬪于虞蓋以德化之也文王能使太姒之有德亦身率之耳詩曰刑于寡妻至於兄弟以御于家邦皆非使人教之也在易之家人曰男正位乎外女正位乎內男女

正天地之大義六二之爻辭曰無攸遂在中饋言婦人
凡事無所專持主饋食於中耳今天官之屬乃使九嬪
世婦女御如女祝女人與焉春官之屬乃使世婦世吏
內宗外宗與焉在世婦則每宮卿二人是禁幃之內男
女雜列其職豈分別內外之理哉古者內外言不出入
於悃今使宮嬪而屬六卿使朝臣而化九嬪周公必不
爲是也又曰凡賓客之裸獻瑤爵皆贊說者謂王同姓
及三王之後來朝覲爲賓客者行裸禮時后則亞王禮
賓王享燕之后則亞王獻賓瑤爵后所以亞王酌賓也
此又不可之甚者方宗廟之事后助王祭禮也賓客何
得與后相酌卽爲王同姓三王後乎以在中饋正位乎
內之婦人使之外接賓客雜與有司行裸獻之禮則易
家人之道不足爲訓也釋者又引陽侯來朝於穆侯穆
侯享陽侯夫人助君子酌于賓陽侯見夫人色美遂殺
穆侯而竊其夫人故夫人廢享夫人之禮誠如是說則
周禮制未足以經國家其弊乃至於使其臣竊君之夫
人豈防亂之禮意乎予謂君有賓客必無后夫人裸獻
之禮此果有之則陽侯竊夫人之亂亦宜至於此矣蓋
此特漢儒以后夫人有助祭裸獻之禮而謂賓客亦然
世人惑其說不見其禮行於世故爲陽侯竊夫人而廢

夫享之說也又曰凡建國佐后立市設其次置其序正其肆陳其貨賄出其度量祭以陰禮此又不可也婦人無外事何得以立市乎說者謂后職主陰王立朝后立市陰陽相承之義若然凡事之屬於陰者皆后主之也祭天陽也祭地陰也祭日陽也祭月陰也祭祖陽也祭社陰也然則祭地祭社祭月等事何不歸之后乎吾聞神農教人日中爲市者矣未聞后之立市也聞舜之巡狩同度量衡者矣未聞后之出其度量也王之事后不得與猶后之事王不得與也日昃乎晝月昃乎夜冬不相侵而後得陰陽之義也是故牝雞之晨周王數其惡哲婦傾城詩人記其亂歷觀聖經之訓未有婦人與政者獨漢儒序詩以求賢審官知臣下之勤勞爲后妃之事蓋悖禮亂常之謬說不可以訓也作周官書者之說與序讀內宰意所不可者三以陰禮教六官教九嬪以婦職教九御一也凡賓客之裸獻瑤爵二也凡建國佐后立市三也以爲誠如此則陰陽非以相成乃以相侵爲亂之本秦漢以來女禍相仍蓋不知道者之說有以啟之也可不戒哉

周禮六官之圖

周六官

天官冢宰掌邦治

地官司徒掌邦教

春官宗伯掌邦禮

夏官司馬掌邦政

秋官司寇掌邦禁

冬官司空掌邦事

六官曰天地春夏秋冬者天官

所掌王宮內外及百官皆在上

之事天覆象也地官所掌教養

斯民皆根本之事地載象也春

官掌禮樂合天地之和春生象

也夏官掌政皆均平大事夏大

象也秋官掌刑裁物之過秋殺

象也冬官掌事萬物各止其所

冬藏象也故六官皆實理以成

天下之務如太宇之六合也

惟王建國辨方正位體國經野設官分職以為民極

四海之治歸于王畿王畿歸于王朝王朝歸于王躬而

王建其有極故辨方正位則前王後官內外不相質前

朝後市義利不相干而朝廷正矣體國經野則王國王

畿各止其所而邦畿千里正矣設官分職則天下之治

大綱小紀靡不畢舉矣所以大中至正為萬民之表極

焉而治道不出于此故六官之首皆以此語冠之也

周禮六官

釋曰易首乾象天禮首天官建冢宰法天易坤承乾地

配天禮天官掌邦治象覆幬司徒掌邦教象持載蓋教

以宣治而地守卿配天也君治教天之道也天地設位
而易行易乾元亨利貞禮宰統百官禮政刑事物有其
官上法乎天行是故法象莫大乎天地變通莫大乎四
時憲天聰明法時順布分職聯事爲民極莫大乎六官
曰夫官卿於六官並列何也曰易乾坤於六子亦並列
也天地四時一不具即覆載生成之德詎有偏乎其並
列象分異也其聯事象功同也譬則風雨露雷共而化
工宣生長收藏合而歲功成經脉竒絡相傳輸而百體
清和咸理也然何獨事聯也天官者以治教禮政刑事
爲其治者也地官者以教治禮政刑事爲其教者也春
官者以禮治教政刑事爲其禮者也夏官者以政治教
禮刑事爲其政者也秋官冬官者以刑事治教禮政爲
其刑事者也譬言天而五王四時統於天言地而五運
四氣統於地春夏秋冬各以其時行而覆載生成之德
各正具備也播五行於四時而木火土金水歲月日時
干支子母迭而運也易先天圖天地定位而雷風水火
山澤錯列以成體後天圖帝出震齊巽相見致役說戰
勞坎終始乎變化成萬物也其道一也宗伯掌其禮曰
春官何也曰乾元統天禮三千三百一天故禮者體仁
長人之紀也記曰宗伯之官以成仁司馬掌邦政曰夏

官何也曰政者正也司馬掌政張皇六師赫赫濯濯而後能以萬國寧大正人之道也譬則夏之日乎伊可畏而助長物也抑雷霆乎時雨乎殫是動而震動優渥過化而不留也夏盛德在火故兵猶火火烈其舉而民勿之有犯也故兵藏於民火設不用而諸侯自爲正夏官卿之道也記曰司馬之官以成司寇曰秋官司空曰冬官何也天地之氣收而肅肅漸以威而終之藏以固也秋摯也司寇義刑義殺驅而納之善象之曰秋官冬固藏司空居四民時地利藏而固之富有生之其象也大哉乎冬官之事典三富萬民而夏官之董兵曰政秋官之制刑曰禁也明兵設不用刑有禁欲無犯也連于矣易曰天地之大德曰生後世極兵刑之用於水德而世嗣竟殄則逆天用焉故也曰書周官有三公而禮經無列何也曰三公無官也天以紫宮樞極統萬象而居其所不動不自顯其光所以爲神也帝以道揆法紀統六合而師保凝丞左右審勿不自勞于事所以爲聖也周官論道而不及以六政以尊道也九經尊賢而不列之大臣惟貴德也故三公無官也天地者道之本也陰陽者道之運也三公者洞幽明之故握元化之統備淵浩之德神而明之默而成之不言而躬行之者也三孤

者慎觀三師之德行而審諭之於道者也公調而燮之
孤審而亮之公微言而篤行之孤審象而弼丞之然後
能襄於天道揆立焉是奧樞之任也孔子曰脩身則道
立尊賢則不惑曰前儒言之三公不備官也三公之有
官皆六卿之上攝者也諒乎曰唯唯否否三公道揆之
所出六卿法紀之首也議道揆者本天質道主格王心
焉敷道治於民是故六卿老外倦勤於政內深喻于道
則使之釋政而任道其任矣奧者明之根明者奧之符
不求端於奧而求於理明者末也既握樞於奧而兼以
理明者諄也以師保之尊而復尸宰司之事即胡以平
政是明聖之所不處也任六卿之務而復議調燮之道
則何以疑道是明聖之所不能也且王者之於道也訐
謨密勿靡息而豫怠焉師保傳者時省微而輔危以一
之於道者也蓋昔者武王克殷甫下車訪箕子受洪範
焉踐祚三日就師尚父齋宿三日折行西向再拜受冊
書焉而壹不備其官將王德無于此闕乎是明聖之所
不爲也其謂官不必備者難其人即不必其備可也而
何可一無設也故三公不設而以為兼官若加官也周
季世之事非公本所為建官意也曰周六服有群辟經
不具何也曰六服有分土矣群辟有君道矣教不易政

俗各因方王何敢知焉六卿分職列屬王朝王畿井井
 秩秩而九牧有倡也且建牧立監太宰王之正畿疆立
 社稷大司徒專之大史掌其典職方掌其籍大行人掌
 其禮蓋邦國六典咸受成於六官於王治豈有外哉記
 曰天子三公合以執六官均五政齊五法倡九牧以御
 治此之謂也

周禮六官存亡

周禮之亡也非真亡也雜之者誣之也周禮之不果行
 也非不可行也泥之者累之也以周禮之僅存而亡于
 不善學者之樵廢于不善用者之泥也則聖王之法將
 遂至于堦亂而其心思之所繼于是乎益窮古先聖王
 治天下之大經大法其可見于今日者莫如周禮周公
 相成王明聖述作躋世太和一時生養斯民之道固已
 備矣然猶慮天下之大後世之遠無經制以維之則其
 勢必不能無敝于是蕪三王施四事夜以繼日竭吾精
 神心術而為之舉其大綱則其建官以六典其兵農以
 井田其民取以什一其養士以學校其治天下以封建其
 威民以肉刑及其節目則八法八柄九貢九兩之序祭
 祀朝覲冠昏喪紀師田行役之詳內而王宮闈寺嬪御
 絲枲之事外而畿甸侯甸要荒蠻貊之宜繁而星躔卜

筮醫巫工什之技細而昆虫魚鱉鳥獸草木之微罔不
具備彼其處心積慮上徹唐虞下垂萬世縱嗣有辟王
而其法制猶可維持而未墜者賴有周禮在也孔子去
周公未遠而曰文武之政布在方策當時周禮在魯所
謂方策者豈即周禮耶孟子當戰國時始言諸侯去先
王之籍豈周禮在戰國時諸侯即已去其籍耶遭秦焚
書至籍散逸漢人得之煨燼之餘斷簡殘篇編帙散亂
而冬官遂亡河澗獻王購以千金不得劉德輩乃以考
工記補之夫使冬官而果亡也則其補之也固無不可
鄭玄又從而註之夫使考工記而果可以補冬官也則
其註之也亦宜今以周官考之自家宰司徒宗伯司馬
司寇而下曰司空掌邦土居四民時地利則掌邦土者
司空職也又以六典考之自治典教典禮典政典刑典
而下曰事典以富邦國則富邦國者司空事也夫所掌
而曰邦土則凡任土度地封域之廣輪民物之衆寡井
牧之所經畫焉者皆邦土之職也而所謂建邦土地之
畜與其人民之數制其畿域設其壇壝與夫土會土圭
之法井邑丘甸之制正冬官之所專掌也而何以禡于
地官之職乎以至載師封人遂人里宰之類此任土之
職也何以屬之邦教士方形方之類此封域之職也何

以屬之邦政野廬蜡氏墓大夫之類此道路瑩域之職也何以屬之邦禮邦禁其他如掌次掌舍幕人之類則皆以居舍供王之役者又何以屬之邦治乎觀此則其掌邦土之職散見于五官者可知矣邦國而曰富則凡山林川澤百材所自生庶物所自出財用之所取給焉者皆富國之事也而所謂辨九土之名物制天下之地征教之樹藝歛其財賦與夫土宜土均之法鳥獸草木之繁正司空之所有事也而何以概之司徒之事乎以至虞衡獸獻場圃司稼稻人之類則樹畜之事也何乃屬之安邦國山師川師之類則珍貢之事也何乃屬之服邦國雍氏萍氏朴氏雉氏之類則藪澤之事也何乃屬之詰邦國其他如巾車典路司裘司服追師染人之類則皆製車服以供王之用者又何乃屬之平邦國和邦國乎觀此則其富邦國之事襍出于五官者可知矣且以小宰所掌之六屬考之一曰天官其屬六十二曰地官其屬六十三曰春官其屬六十四曰夏官其屬六十五曰秋官其屬六十六曰冬官其屬六十六官屬合三百六十大事從長而小事專達未嘗有餘欠也今以周禮所載之五官觀之天官之屬六十而羨其三教官之屬六十而羨其十有九政官之屬六十而羨其九刑

官之屬六十而羨其六冬官之屬乃獨全闕焉餘羨于彼而全闕于此獨不可取盈乎故冬官錯雜于五官而其職尚在是名雖爲亡而實未嘗亡也漢儒補以考工記而其職遂亡是名雖爲補而實則已亡也蓋徒以司徒之爲地官遂以土地物產之事盡歸地官職掌之中而不知司徒之掌邦教豈以度凡居民之職皆爲司徒教化之事乎矧以司空之官而槩之以飭化八材之事則其所以率屬者其止於百工之職已乎以冬官之典而盡之於審曲面勢之能則其所以佐王者其止于工事之式已乎或者因此遂指爲漢儒附會之說不知六所附會者止于考工記一編而不可以病此書之全也或者又謂爲文王治岐之書不知其所載者皆爲天子之事而不可以言侯國之舊也或又因其凡伐正邦四時教戰遂詆爲戰國陰謀之書不知寓軍政明教化此先王仁義之師也豈可以陰謀毀哉或又因其九賦歛財九式均用遂指爲成周理財之書不知倡九牧阜兆民此先王惠養之政也豈專爲理財設哉井田世業萬世之良法也而王莽以之稔新都之亂則以土田永奪旣失民心而泉府市司擾害流于市里大非先王養民之本意矣况其以篡竊之奸而播毒痛之政其致亂豈

特不善用周禮之失哉阜通貨賄九職之所任也而王
夫石以之釀靖康之禍則以均輸專利已非國體而青
苗手實搜括編于閭閻大非先王足國之常經矣况其
以偏執之資而引凶邪之黨其釀禍豈特不善用周禮
之失哉善學者誠能因其缺以求其全師其意而不泥
其迹則先王之治法復明而聖人之心法可見矣嗚呼
有關雝麟趾之意然後可以行周官之法度周公之制
禮其仁天下之心爲之也欲求聖人之法者求之聖人
之心而已矣我國家稽古建官六卿分職禮樂刑備典
則昭垂其于成周建都立極之意固已得之而損益盡
會至于各官之書則俞廷椿吳幼清諸先生相繼申明
之而聖王仁天下之心可復覩其全矣雖然周公以內
宰嬪婦宮正宮伯皆頒于天官而內府外府之出入服
御庖膳之士供亦皆與焉其意微矣人君之寢處起居
食息賜予冢宰莫不與聞而所以防微杜漸者得以預
爲之所至于師氏保氏之職所以詔王徽而諫王失者
又諄諄焉其所以養君心而正朝廷以及天下者固大
臣職也成王之爲令主也有由然哉

周禮總意

善讀古人之書者在師其意而已矣苟得其大意而觀

會通焉則參互變易而法制之周莫非美意之敷施也若徒泥其迹則或詳於此而畧於彼或行于古而不可行於今或原錯簡闕文或後人增竄雜亂俱莫之能辨矣曾謂讀周禮者可以局見拘泥之哉况先儒一是一非各有成說其書出自周公與否無論已彼體國經野設官分職後代法雖變更意多沿襲獨官府一體兵農一致教士于鄉而選舉之三事于治體所關尤切乃後王皆莫之祖述焉則深可慨也嘗讀天官篇見其浩然廣博靡不併包森然詳密靡不貫徹真如天之含容徧覆無一物不在其生生中也非聖人既竭心思何其法之美善一至此哉蓋惟王宮后宮莫非冢宰所統故宮正而下主宿衛及王之左右內宰而下主內政及后之左右無非欲王之贊襄使令罔非哲人常變守衛罔非吉士一匡王以正也所以王后世子動有式法寺人內監悉有禁令王誰與爲不善哉視後代宮中事宜雖宰相莫得預聞者相徑庭矣然此惟得其宮中府中相爲一體之意而變通之可也不然古今時勢懸隔匪特天子與邦君送迎揖讓后妃夫人與尸賓獻酌后世不可通行如宮闈之內豈府史胥徒所得與九嬪世婦豈內宰所教乎但官府統攝內外聯比此則天下根本所繫

真世世不刊之典也大司徒地官主土與民大綱在分
土居民之法比閭族黨州鄉以施教化遂溝洫澮以正
疆界通水利井邑丘甸縣都以稽民畜起徒役而伍兩
卒旅軍師之法寓焉是民制起于比閭鄰里兵制起于
五兩卒徒居則相與荷耒耜以相耕耨出則相與荷戈
盾以相戰守所以人服習而政便安上易事而下易使
也以此較之後世民自爲民出粟以養兵兵自爲兵出
身以衛民兵農兩病者大不侔矣何先儒之論止知王
國六軍取足于六鄉是六鄉七萬五千家出六軍七萬
五千人則六鄉人人盡用歲無更休縣遂都鄙居然無
事何勞逸不均也况王國止此六軍則公私之田孰與
耕獲天子巡狩征討之類孰爲之迭用哉不知比閭族
黨州鄉惟以服役守禦猶後世京軍王居守王畿爲國
本也伍兩卒旅軍師實通王畿千里之內更休而迭調
之猶後世郡國調遣更番上直之兵也鄉言教而遂言
農彼此正可互觀以民數起兵數鄉遂實非偏重此兵
農合一周制所以爲至善也得此意而變通之非治世
良法而何王教莫先於鄉故以鄉三物教萬民歲時讀
法于以攷其德行察其道藝凡有賢者能者則書之三
年大比則興其賢者能者而賓之由是鄉老鄉大夫獻

賢能之書于王王再拜受之登之天府是教之于鄉莫
非德行道藝之術而賓禮于鄉莫非德行道藝之人其
視後世上之所教下之所學競習辭章獵取穀利不知
六德六行六藝爲何事及舉賓興之典則糊名易書若
將以奸竊待之而士一進用則盡棄向之所習以徼功
利于宦途者胡可同日語哉世主不欲比隆成周則亦
已矣如欲親覩聖王德化則鄉舉里選之法舍周禮將
安取衷哉但鄉遂一也遂亦有秀民之可教有賢能之
當舉也何爲德教止行于六鄉而不被之于六遂乎若
曰六鄉在國國多士故鄉大夫之屬主乎教六遂在野
野多農故遂大夫之屬主乎事又曰遂之秀民悉升之
鄉而教焉則遂之民何不幸而見棄於王教耶即此變
而通之教之鄉舉之鄉者亦可行之遂則是法也雖萬
世可無弊也可見三者之善亦當師其意不泥其迹周
公良法美意迄今猶存周禮可行之古亦可行之今矣
故程子曰必有關雝麟趾之意然彼可以行周官之法
度

非周禮辨

聖王治法自大德而川流不俟更改而後定其禮經自
神化而模寫非有思勉而後成欲窮之者如登大華即

之而愈峻如涉滄溟測之而愈深故先儒讀經無疑至
有疑有疑至無疑思而不得鬼神將通之然後爲庶幾
耳豈若史書集文粗畧淺近一覽而盡得其旨義乎非
周禮者若林孝存何休輩不下數家指摘瑕釁無如胡
仁仲之詳著書數十萬言辨析精微無如李德明之苦
移易周禮者若吳幼清余壽翁王次默輩亦不下數家
參互演繹集成後出莫如舒國裳之備以愚觀之胡氏
謂大宰六十屬無一官完善者其說淺陋未見其的然
不可破才高之人乍見而不領畧遂置不復思任意剖
決雖欲自絕于經何損哉舒氏作序辨圖釋別僞繼之
定本夫先王之法本安也而人自不安聖人之書本明
也而人自不明各以其意見爲之更定初若快意以語
不知似乎可觀回視作者精義其謬何啻千里

王畿侯國地方里數

先儒紛紛之說以爲王畿中鄉遂都鄙輕重異制畿內
外寬簡異法三等侯國亦有多寡不同大率不明里數
以四面方里而計地少三倍夫孟子方里而井此方字
爲實故謂四面方一里爲一井地方千里地方百里此
方字爲虛猶地面地土之云故以午貫一直而計四面
各皆千里百里斯乃爲實若以四面總計則方千里者

二百五十里方百里止二十五里而已又泥于同十
爲封封十爲畿之說地又少數倍不知同十爲封者言
自此已上乃可以封國若上公當有四十封之地十同
者極小之封耳封十爲畿者諸侯封國大者食實封一
百二十五里小者五十餘里故十倍之爲畿耳苟封國
止十同之地一直不過七十餘里齊魯諸國若費邑卽
墨皆原封疆也數百里之廣奚止于七十里十封之地
爲百同四面總一千里一直止二百五十里周都關中
沃野千里又蕪成周之地豈若是小耶包咸何休諸一
同日里卽諸侯百里之地諸侯合有車千乘一同之地
亦當出車千乘故謂一同出車十乘一通出車一乘三
一乘百人數不可缺也地有上中下約之爲一井四家
數不能增也以四十家而出百人二家內應出五人有
是理哉其弊皆因指定四面爲百里又限于諸侯千乘
遂爲此說以合之也季氏以方里爲井爲一里故謂公
侯之國方百里提封萬井爲里者萬大國三軍則每井
當出三人七十里之伯國當積五十里是半于公侯次
國二軍則每井當出四人子男方五十里爲方里者二
千五百里又半于伯也小國一軍每井亦當出四人此
則計侯國原出車之數止計其三軍二軍一軍又謂每

軍止萬人遂生出三四人之說獨不思一井有上中下
受地止于四家而出四人止可以供軍將何以耕田而
別有所爲乎馬氏則據司馬灋成方千里出革車一乘
以百井而出一車百里之封爲方十里者百僅出車百
乘不及千乘之數因增爲三百一十六里有奇以附于
周禮封疆方四百里之說季氏亦據成方十里出車一
乘同方百里提封萬井出車百乘同十爲封十萬井出
車千乘封十爲畿畿方千里百萬井出車萬乘遂以謂
成出車一乘積至百同爲萬乘此畿內之制通出車一
乘積至十同出車千乘此諸侯之制謂畿內地寬侯國
地窄所以不同夫謂通出車一乘者固不足道若謂成
出車一乘民亦不堪命謂天子之車止此萬乘亦限于
以四面總計爲千里故不知有更休之灋且天下之民
一也豈有內輕外重遂差十倍之遠哉愚之計地以午
貫一直而論中間所包有數倍之多故天子之地四面
一直千里上公一直五百里至男邦一直百里其地既
廣名山大川不以封封內惟有小山川除其三分之一
故以天子計之爲田一千六百同每同出車百乘此乃
備車之數猶今十排年人盡兵也通王畿一十六萬乘
司馬法所陳是也有簡稽之數爲更番調遣而設卽府

兵之制猶今之該年每十乘而稽其一通王畿內一萬六千乘經傳所稱天子萬乘是也有用軍之數爲大師大田征行而設卽後世從征之士猶今里甲之當直者天子止于六軍爲大司馬敎閱之軍大雅棫樸云周王于邁六師及之是也其調遣之法于該年輪流而徧侯國之制亦每同出車百乘當有數千乘亦猶今之十排年也其簡稽之法十年一輪故止稱千乘至于所謂三軍二軍一軍者亦該之當直者耳是故王畿侯國鄉遂都鄙出車之數並無多寡不同斯民之役並無勞逸異制自王國以達于四海均平普徧所以爲萬國咸寧之道也或疑禹會諸侯於塗山執王帛者萬國武王伐殷諸侯不期而會者八百如周禮封侯之大安得有此國數耶蓋公食者四之一侯伯食者三之一子男食者半則其餘皆爲附庸且附庸之封必小不過一二同之地故寰內無害其爲數千國矣

諸侯封地實封食祿

按書武成孟子王制所言畿封之制多有牴牾愚嘗以周禮爲據而後得其說也凡封國有管轄之地有實封之地有所食之田周禮上公之地方五百里侯方四百里伯方三百里子方二百里男方百里卽詩之錫之山

川土田附庸司馬遷所謂周封伯禽康叔于魯衛地四
百里太公于齊兼五諸侯地正與周禮制合此管轄之
地也其言食者半三之一四之一此其實封之地今觀
春秋齊魯等國封疆皆可驗也孟子所言君十鄉祿者
大國君田三萬二千畝次國君田二萬四千畝小國君
田一萬六千畝此一歲君所自食之祿也故以司馬法
同封之制合職方氏封國之法而計之天子千里之地
爲田一千六百同出車一萬六千乘徒一百六十萬人
諸公地方五百里爲田四百除附庸之國其食者四之
一實封田一百同出車一千乘徒十萬人故爲王畿十
分之一若如王制拘以百里止得天子百之一而已侯
之地四百里爲田二百五十六同除附庸之國其食者
三之一實封田八十五同出車八百五十乘徒八萬四
千人伯之地三百里爲田一百一十四同除附庸之國
其食者三之一實封田四十八同出車四百八十乘徒
四萬八千人子之國二百里爲田六十四同除附庸之
國其食者半實封田三十二同出車三百二十乘徒三
萬二千人男之地百里爲四十六同其食者半實封田
八同出車八十乘故以千里之地大約封公者四國其
食者四之一封侯者六國封伯者十一國其食者三之

一封子之國二十五封男之國百其食者半自所食皆
爲附庸之國矣若如王制之說州方千里州建百里之
國三十七十里之國六十五十里之國百有二十九二
百一十國卽如方百里之國爲田十六同出車一百六
十乘大國三軍合用三百七十五乘將安取辨乎此其
說誠不可通矣畿田采地孟子云天子之鄉受地視侯
大夫受地視伯元士受地視子男王制云天子三公之
田視公侯鄉視伯大夫視子男元士視附庸周禮載師
以家邑之田任稍地以小都之田任縣地以大都之田
任量地大約公處于大都孤鄉處于小都大夫處于家
邑夫天子畿內之地不過千里苟三公之田視公不幾
于半天子之疆乎是不然王畿之縣都不世量山川人
民以爲都邑而使掌其治教賦稅非若諸侯之封國割
其地以與之故天官九兩一曰牧以地得民二曰主則
以利得民而已所謂受地者但可言其所食與出封耳
且孟子王制所述視地有不同者嘗觀春秋所書王臣
三公稱公卿稱伯中大夫稱子下大夫稱字元士中士
稱名下士稱人列國惟命卿以名登于冊大夫謂之微
者稱人而已故周禮掌客云三公眡上公之禮卿眡侯
伯之禮大夫眡子男之禮士眡諸侯之卿禮庶子一眡

其大夫之禮典命云王之王公八命其鄉六命其大夫四命及其出封各加一等故三公在朝則食大國君之祿出封則爲上公之國六卿在朝則食次國君之祿出封則爲侯伯之國中大夫在朝則食小國君之祿出封則爲子男之國下大夫食大國孤之祿出封附庸之國元士之爵祇諸侯之鄉中士之爵祇諸侯之大夫下士之爵視諸侯之上士而其祿則自下大夫而下並與諸侯之臣同何嘗如王制所云天子縣內凡九十三國耶蓋惟畿內不以封也故大而縣都小而公邑皆可以治如邵公之循行南國畢公允釐東郊銜命而往單車可伐自無僭逼之嫌苟如孟子所言萬取千焉則其地是地而亦必至于篡弑之相尋矣苟如王制所封之地又何必設朝大夫都宗人都司馬都則都士等官而以八則馭之乎惟其祿視夫諸侯之所食是故公食三百二十井三公爲田九百六十井孤鄉食二百四十井三孤六鄉爲田二千一百六十井中大夫食一百六十井周禮五官共中大夫三十一人合各官不過四十人之數爲田六千四百井雖舉朝公卿中大夫之祿不過九井五百餘井尚不及十同公田故雖告老而猶食于家必有大故而後收其田里八柄所謂奪以馭其貧也及

其身沒而子孫猶得世其祿蓋非世其公卿大夫之祿也記曰天下無生而貴者天子之元子士也是故無大夫冠禮而有其士禮蓋但世其士之祿耳故仕者之子孫賢則命之爵不賢則祿足以代耕圭田足以祭祀所謂天子有田以處其子孫也故以畿外邦國言漸遠所尊者雖大如上公不過天子十分之一已執夫居重馭輕之勢小如子男亦出兵車百餘乘而足以守宗廟之典籍以畿內縣都言密邇所尊者子弟雖賢而不世自足以待無窮之賢縣都雖大而不自不虞夫僭逼之患至其後世王畿則子弟襲封侯國則大夫世爵而有孟子大家弑奪之說諸侯則併吞附庸大夫則分裂公室而有孔子陪臣執國命之譏與夫王章一掃而空而封建遂爲一大弊矣大抵孟子之說畧王制之說拘惟一槩夫周禮以圖攷之然後知其立法之妙而可以盡見夫先王精意之全也或疑諸公方五百里其食者四之一爲一百二十五里諸侯方四百里其食者三之一爲一百三十三里則侯國地反多于公乎是不然經文于封疆定其里數而其食則就其中爲之等而未嘗定其里數蓋地大則中包廣而外之里數反少地小則有四邊而外之里數反多不可以里計也故公田四百同

圖言紀 卷十三 九十四
四之一爲實封一百同侯田二百五十六同三之一則爲實封八十五同此其多寡之數自有等級而不相混矣或又以諸男實封八同出車八十乘小國一軍合有一百二十五乘此則一軍而不足何以立國乎蓋八十乘之車爲三師而有餘故或益之地以足一軍之數或止于三師亦可以應敵其制不可得而詳矣

畿內畿外班祿之制

按司祿雖缺然以孟子春秋攷之則炳如也孟子曰大國地方百里君十卿祿卿祿四大夫次國地方七十里君十卿祿卿祿三大夫小國地方五十里君十卿祿卿祿二大夫自大夫而下則三庶之國皆大夫倍上士上士倍中士中士倍下士下士與庶人在官者同祿祿足以代其耕而耕者之所獲則有食九人至五人之五等庶人在官者其祿以是爲差六國有實封之地大司徒其食者半三之一四之一是也有所食之祿君十卿祿而下是也自卿而上大臣與君同休戚故三等之國隨其大小下于君十倍自大夫而下少則無以爲食故三等之國命雖不同而祿無隆殺自下士而下則取足以代耕而以耕者之所入爲差畿外君臣之祿不過如此至于畿內臣庶之祿孟子所述卿大夫元士之祿與諸

經不合攷之春秋三公之爵稱公則當同大國君之祿
卿之祿稱伯則當同次國君之祿中大夫之爵則當同
子男之祿下大夫稱字則其爵視附庸之君與大國之
孤而祿之所入亦當視附庸之君蓋半于小國之君也
觀秋官掌客諸侯待王臣之禮三公視上公卿視侯伯
大夫視子男亦與春秋合當以之爲證可也其元士以
下若依命數而賜祿歟則元士視列國之卿中士視其
大夫下士視其上士若以人衆不可有加于侯國歟亦
當視其三等之士惟此爲不可攷耳夫公卿大夫士庶
之祿皆給自公田官吏有更易而田賦無增減田爲母
而官吏爲子苟給之以田永爲常業亦已足矣必入于
司祿而後給之者蓋歲有豐凶功有上下故必收于官
而給之所謂家削之賦以待匪頒且以示君上養賢之
意也其公卿大夫各有采地而其所以治夫采地者又
各有官蓋治王朝官府之事則食在朝家削之匪頒治
甸稍縣都之地則又當食采地之常祿如宋朝之蕪官
則有蕪祿亦優厚君子之道而其所統鄉遂都鄙之吏
則各食于其地八則所謂祿位以馭其士大約一視其
爵以爲祿也然則司祿所掌亦不過此而周室班祿之
制庶幾無不可得聞者乎

已上數段雖孟子之說不以爲然其尊信周禮亦至矣且其說各有據故併錄之亦以見攷古者不可執泥一說也

周禮總論

馬端臨氏曰經制至周而詳文物至周而備有一事必有一官毋足怪者如閹閹卜祝各設命官羞服泉貨俱有司屬自漢以來其規模之瑣碎經制之繁密亦復如此特官名不襲六典之舊耳固未見其爲行周禮而亦未見其異於周禮也獨與百姓交涉之事古今異宜蓋三代之昔寰宇悉以封建上之人所以治其民者不啻如祖父之于其子孫田土則少而授老而收又從而視其田業之肥瘠食指之衆寡而爲之斟酌區畫俾之均平貨財則盈而歛乏而散又從而補其不足助其不給或賒或貸而俾之足用所以養之者如此司徒之卿州縣鄉遂歲嘗讀灋攷其德藝糾其過惡而加以勸懲司馬之鄉旅師軍四時大田行其禁令而加以誅實所以教之者如此其事又似繁擾而不見其爲法之弊者蓋以私土子人痛痒相關脉絡常相屬雖其時所謂諸侯卿大夫者未必皆賢然既世守其地世撫其民則自不容小視爲一體既視爲一體則姦弊無由生而良灋可

以世守矣自封建變而爲郡縣國家之濃制率以簡易爲便慎無擾獄市之說治道去太甚之說遂爲經國庇民之遠猷所以臨乎其民者未嘗有以養之也苟使之自無失其養斯可矣未嘗有以教之也苟使之自無失其教斯可矣蓋壤土旣廣則志慮有所不能周長吏數易則設施有所不及竟于是法立而姦生令下而詐起處以簡靖猶或庶幾稍涉繁夥則不勝瀆亂矣則知周禮所載凡法制之瑣碎繁密者可行之於封建之時而不可行之於郡縣之後必知時適變者而後可語通經學古之說也

周禮總論


自漢惠除挾書之律孝武建藏書之策齊魯諸儒統經競進傳儀禮者始於高堂生傳大戴禮者始於瑕丘高奮周禮之書未出也河澗獻王得諸李氏而因以土諸秘府維時學官博士顯門持業非其師說不稱而整然求所以相勝一有異聞隨聲群詆漢武帝以爲瀆亂不經之書蓋諸儒之說誤之也自劉歆好之賈鄭父子習而宗之其說遂稍傳於世至王仲淹氏曰周禮其敵於天命乎朱仲晦氏曰周官布濩周密乃姬公運用天理之書蓋至於是而其論始定矣然六官之中惟冬官缺

馬河澗獻王補之以考工記取工匠器械之事與治教
政刑躋而並列遂使其書不信於天下故世儒譏之曰
累周禮者劉德也非此之謂耶乃潛心是經者又網羅
遺失探討尋繹各以意見而爲之說宋葉時之補亡元
吳澄之考註其最著者也時之言曰秋官有典瑞夏官
有量人天官有染人地官有鼓人以至巾車司裘司弓
矢之職秩然具在蓋謂冬官實未嘗亡而散見於五官
之中也澄之爲書麗內史司士於天官麗大司樂諸子
於地官麗封人牧人於春官麗銜枚司隸於夏官麗司
賦司稽於秋官而縣師廛人等職則以爲冬官之屬蓋
謂五官互見而冬官亦未嘗缺也王葉氏之說則冬官
獨專而五官反淆王吳氏之說則詮次失倫而意義乖
析矧俞廷椿之復古編王次點之訂義丘吉甫之全書
紛紜錯綜莫知所適與之論議其不爲聚訟者幾希矣
此愚之所未解也夫詩書六藝之教必折衷於孔氏矣
孔氏之春秋也終於獲麟距隱桓之世未甚遠也甲戌
己丑夏五紀子伯之訛皆因之而不改故其言曰多聞
闕疑又曰蓋有不知而作者我無是也六經自秦火以
後書亡四十三篇二雅各亡其六篇於聖人之經則何
嘗有所損哉孟子之言班爵祿曰其詳不可得而聞也

班固之論禮經以爲自孔子時而不具也諸儒生於數千載之下乃欲掇已去之籍輯煨燼之餘而以己意爲之傳會是其智有加於孔孟然則聖人之經終不可明乎蓋聖人之經聖人之心爲之也嘗觀周禮一書纖悉具備自天官大宰以逮於雉氏柞氏自八典八則以逮於草木昆蟲品式條貫布濩流行而淵然盎然者實充塞於其間饒饒至瑣也何與於天官鉅細一也內政至密也何與於大宰官府一也馮相保章司天也何與於春官天人一也遂師司田野也何與於夏官兵農一也山澤倉廩民所需也何與於司徒富與教一也當姬公制作之日竭心思以通於三王其精神貫徹而無所窒闕其統紀相維而無所隔閼即五官之篇皆冠之曰體國經野設官分職以爲民極極之爲言中也洪範所謂建其有極者也建極之義宜專屬於教典而奚各冠於五官嗟乎此其義難言矣沉思於度數之外而冥會於義象之表則冬官雖缺無害也固不必強爲之解亦不必更置而互易之也必欲櫛字比句以今人之法而配諸古人則其鉅者已析之而使二而矧其瑣瑣者也竊恐侵尋不已全書遂亂是昔之周禮亡其一而今之周禮亡其大聖經之不明吾不知其所終矣自是書之出

習而用之者何限劉歆著錄畧而六幹五均託名於臬
府王介甫訓釋萬餘言而青苗市易藉口於國賦蘇綽
用其五六而不足以治周蘇威用其八九而不足以治
隋彼周與隋循迹用之猶曰無益於治耳劉歆王安石
窮年斃斃蔽其精神於訓詁而卒以其術禍天下窮經
不明之害一至此極乃世之逞其說者猶紛紛而未已
也可恠也夫今之言學術者必曰黜百家尊孔氏然莊
周斲輪之喻至今學者稱焉顧沿襲口耳醜聖人之糟
粕而又以己意亂之上之背闕疑之訓下之蹈斲輪之
譏其惑也亦甚矣藉謂愚之言均之臆決然猶就

之成書而論之也蓋大史公論帝德帝系二紀曰總之
不離古文者近是而申公之授詩也疑者則闕而弗傳
是孔氏信而好古之教也



國朝文獻通考

卷之十三終

